



**Have you Enrolled?
Toksave bilong Ilektral
Komisen - P14 na 15**



**FIFA Wol Kap
anda 20 meri soka
eksen - P8 na 21**



O'Neill promotim invesmen *APEC bung long Cuba...*

PRAIM Minista Peter O'Neill i kamap namba wan lida bilong PNG na Pasifik Ailan rijon long go lukluk raun long Cuba na sainim agrimen long strongim poroman namel long tupela kantri.

Dispela raun bilong Paim Minista O'Neill i go long komunis ailan kantri bai lukim tupela kantri i sainim agrimen long larim ol dokta bilong Cuba i kam wok long haus sik long PNG, strongim tred, invesmen na bisnis rilesens namel long tupela kantri, na promotim spots menesmen long sait bilong boksen.

Mista O'Neill wantaim delegesen bilong Gavman i bin kamap long Havana long Cuba long Mande long dispela wik bihain long ol i pinis long bung bilong APEC long Lima long Peru long Saut Amerika.

Ol ripot i tok Mista O'Neill bai sainim ol pepa o agrimen wantaim Presiden Raul Castro long larim Cuba i salim ol dokta i kam wok long ol haus sik long PNG.

Cuba bai givim boksen trening na spot menesmen long boksen long PNG.

Standet bilong medikol na heltke long Cuba em i antap tumas na winim arapela ol bikipela divelop kantri.

Mista O'Neill i tok tupela gavman bai sainim agrimen long larim ol manmeri long tupela kantri i kisim visa long ples balus.

Long APEC bung long Lima, Mista O'Neill i bin stretim toktok wantaim Deputi Paim Minista bilong Thailand, ACM Prajin Juntong, long opim dairek flait namel long Pot Mosbi na Bangkok, na strongim bisnis na invesmen namel long tupela kantri.

Mista O'Neill i bin tokim Mista Juntong olsem PNG i laikim ol investa long Thailand i kam divelopim turism, egrikalsa na medikel indastri long PNG.

Paim Minista O'Neill i bin holim miting wantaim Presiden bilong Peru, Pedro Pablo Kuczynski, long Lima long las wik Fraide.

Tupela lida i bin toktok long wanem kain ol helpim PNG i ken kisim long Peru wantaim ek-

spirens bilong Peru long helpim PNG i redim em yet long holim bikipela bung bilong APEC long yia 2018.

Mista O'Neill i bin bungim Sif Eksektiv Opisa bilong Facebook, Mark Zuckerberg, na tokim em

olsem sampela manmeri long sampela sosaiti i save putim ol giaman toktok long Facebook long bagarapim nem bilong sampela ol lida na manmeri.

Nupela Kardinel bilong PNG...



L-R: Bihain long seremoni long Vatiken, Rom we i lukim 17-pela nupela Kardinel bilong Katolik Sios long wol long las wik Sarere, nupela Kadinel bilong PNG, John Ribat msc i sanap wantaim Asbisop bilong Rabaul, Francesco Panfilo sdb, wanpela pater na Bisop Rochus Tatamai msc, bilong Bereina Daiosis husat i bin go wantaim nupela Kardinel long Rome. Lukim stori long pes 12.



Wasa Rice 200g
Em Skel Ya
GROWN FOR THE PEOPLE OF PNG





O'Neill bungim lida bilong Peru

PRAIM Minista Peter O'Neill i bin bungim Presiden bilong Peru, Pedro Pablo Kuczynski, long Lima long las wik Fraide long taim bilong bikpela bung bilong APEC.

Presiden Kuczynski i bin bungim Mista O'Neill na toktok long sampela ol namba wan samting long sail bilong holim APEC miting.

Peru i holim APEC miting long

dispela yia long kapital siti bilong em, Lima. Long 2018, PNG bai holim dispela bikpela APEC miting long Pot Mosbi.

Balus bilong Prais Minista O'Neill wantaim ol delegesen bilong PNG i bin pundaun long Air Group 8 Military Complex long Callao long las wik Fraide.

Gelu: Ol memba no brukim lo

REJISTRA bilong Politikel Pati na Kendidet, Dokta Alphonse Gelu, i tok ol memba na gavana i no brukim lo taim ol i tok aut long pablik long wanem sevis na divelopmen ol i bringim long wan wan distrik na provins bilong ol.

Dokta Gelu i tok ol memba na gavana i ken autim wanem samting ol i mekim long niuspepa.

Em i tok dispela kain pasin bilong ol memba long tok aut long ol divelopmen i no brukim Ogenik Lo bilong Nesenel na Lokal Level Gavman Ileksen.

Dispela lo i stopim ol memba na gavana na ol kendidet i no

ken mekim eli kempein taim Gavana Jeneral i no opim rit bilong ileksen yet.

Dokta Gelu i bin mekim dispela toktok taim sampela ol kendidet na ol manmeri i bin askim em sapos ol siting memba i brukim lo taim ol i wok long autim stori bilong olsem wanem ol i yusim Distrik Sevis Impruvmen Program (DSIP) fan insait long las faivpela yia.

"Em i rait bilong ol manmeri long save long wanem ol samting ol memba na gavana bilong ol i mekim long kirapim ples na givim sevis long pipel," Dokta Gelu i tok.

Mista Gelu i tok ol memba na gavana em ol lida bilong kantri na lo i givim tok orait long ol i ken autim wanem samting o i mekim long divelopim ples insait long las faiv yia.

"Sapos ol manmeri i wok long komplek olsem dispela em i eli kempein, mi no ting olsem em i eli kempein.

"Long dispela as, mi no ting ol memba i mekim eli kempein. E mol lida bilong kantri, ol i mas tokaut long olsem wane mol i yusim K10 milien DSIP na PSIP mani ol i save kisim long wan wan yia," Dokta Gelu i tok.

pela bikpela forum o ples bilong bung bilong ol Asia-Pasifik kantri long strongim tred, kamapim moa wok, skelim save na teknikel wok insait long Asia-Pasifik rijon.

"Asia-Pasifik o APEC rijon em i wanpela ples insait long wol we yumi gat bikpela maket long salim ol samting na kamapim moa invesmen," Mista O'Neill i tok.

"APEC rijon tasol i save kamapim klostu long haf bilong globel tred na 40 pesen bilong populesen bilong wol na konsi-uma maket i stap long APEC

"Ol bikpela sans bilong mekim bisnis na inves long ol ki eria bilong mekim mani na senisim laip, i stap insait long APEC.

"Ol toktok mipela i stretim long bung bilong APEC i save gat mak long laip bilong ol manmeri na pikinini long PNG.

"Ikonmik sekta bilong kantri bilong yumi i no wankain olsem bilong APEC polisi na ajenda.

"Mipela i wok long traim long brukim dispela banis i stap namel long yumi na APEC. Dispela bai larim kantri bilong yumi insap long salim ol fam prodak, pis,

Kumul Petroleum gat pawa

KUMUL Petroleum Holdings Limited (KPH) i gat rait long holim o menesim ol mani o intres bilong ol papagraun na provinsal gavman, wanpela opisal bilong kampani i tok.

Em i tok Ambrela Benefit Sering Agrimen (UBSA) bilong kamapim PNG LNG Projek i givim pawa long KPHL long lukautim 4.27 pesen.

Dispela ekwiti bilong ol papagraun i stap aninit long Kroton Namba 2 Limited.

"Dispela agrimen na arapela lo olsem Kumul Authorisation Act i givim pawa long KPHL long lukautim ol intres bilong papagraun long UBSA level.

mineral risos na arapela komoditi long APEC maket.

"PNG em i memba bilong APEC na mipela i gat sans long kisim ol teknikel infomesen, data na skils trening long kirapim ikonomi bilong kantri bilong yumi.

"Bilong mipela, dispela ol samting i ken helpim egrikalsa, marin risos, turis bisnis, SME o liklik bisnis na planti arapela ol sekta.

"Dispela bai helpim yumi long kamapim strongpela ikonomi bilong kantri bilong yumi," Mista O'Neill i tok.

"Mipela i no gat pawa long abrusim UBSA na i go daun. Nogat, dispela em i wok bilong Dipatmen ov Petroleum na Eneji," em i tok.

Em i mekim dispela toktok long kliarim ol toktok bihain long Arthur Somare bilong Resources Logistics Solutions wantaim Raymond Kuai i bin bungim ol papagraun long skruim detlain bilong baim dispela 4.27 pesen Kroton Ekwiti.

"Sampela man i bin fosim ol papagraun long sainim UBSA agrimen long Kokopo. Nau ol dispela man i laik bungim ol papagraun na mekim sampela samting gen," wokman bilong KPHL i tok.



Prais Minista Peter O'Neill wantaim Presiden bilong Russia, Vladimir Putim, long Lima, Peru long taim bilong APEC miting long las wiken.

Ganim Ripot no kisim mani

MEMBA bilong Wabag, Robert Ganim, i no wanbel long gavman i no givim mani long mekim wok bilong Palamentri Riferal Komiti bilong Edukesen (PRCE).

PRCE i bin askim gavman long givim K7.826 milien aninit long 2017 Nesenel Baset, tasol gavman i no katim na skelim dispela mani na ol i no inap long mekim wok.

Mista Ganim i tok dispela em i namba tu taim ol no kisim mani. Pas-taim ol i bin laik long mekim wok long PRCE na askim gavman long katim na skelim ol dispela mani tasol ol i no bin kisim long baset bilong las yia.

"Mipela i no bin kisim fanding long mekim dispela wok long nesenel baset bilong las yia. Nau baset bilong neks yia i no givim wanpela toea long mipela long mekim wok," Mista Ganim i tok.

Mista Ganim, husat i siaman bilong PRCE, i tok dispela pasin bilong gavman i no stret bikos wok ol i laik mekim aninit long PRCE em long



Ol memba bilong PRCE em ol (L-R) Memba bilong Wabag, Robert Ganim, Gavana bilong Isten Hailans, Julie Soso na Memba bilong Jimi, Mai Dop.

sevim moa long 56,000 tisa insait long PNG.

PRCE i bin mekim bikpela wok painimaut long olgeta hap bilong kantri long sekim sam-pela ol hevi na wari olsem salari na entaitelmen bilong ol tisa.

Ol i bin mekim dispela wok painimaut namel long mun Mas na Epril long yia 2014.

"Mi laik tok aut ples klia olsem mipela i mekim wok painimaut na kamapim ripot pinis. Long helpim na harim singaut bilong moa long 56,000 tisa bilong dispela kantri, gavman i mas painim mani long larim mipela i mekim wok we dispela ripot i

laikim long mekim," Mista Ganim i tok.

PRCE i bin givim dispela Ganim Ripot long Palamen long Ogas 26, 2014 na Palamen i bin givim tok orait long olgeta 13-pela rekomedesen dispela ripot i bin mekim.

Nesenel Eksektiv Kaunsil (NEC) disisen namba 63/2015 long Mas Mas 24, 2015 bin givim tok orait long gavman i givim K26 milien long bihainim na mekim ol wok i stap long PRCE Ripot.

Wok bilong dispela anim Ripot inap long stat long 2014 na pinis long 2019.

Namba wan fanding

bilong dispela ripot inap long kisim K7.826 milien tasol dispela i no bin kamap.

Deputi siaman bilong PRCE na memba bilong Jimi, Mai Dop, i bin askim Edukesen Minista Nick Kuman long Novemba 3 long wanem taim gavman bai givim mani long larim Ganim Ripot i mekim wok.

Mista Kuman i bin painim hat long bekim dispela askim bilong Mista Dop bikos gavman i no gat inap mani long fanding olgeta dipatmen na sekta.

Long Novemba 9, Oposisen lida Don Polye i bin askim wanem taim gavman bai

PNGEC lukluk long sevim mani

PNG Ilektoral Komisina (PNGEC) i laik sevim sampela mani bihain long 2017 Nesenel Ilekse, Sif Ilektoral Komisina Patalias Gamato i tok.

Mista Gamato i tok PNGEC bai bihainim dispela pasin we ol i bin mekim long taim bilong holim bai ileksen long Saut Bogenvil na long Samarai-Murua.

Long ranim 2017 Nesenel Ilekse, Gavman i katim na givim K400 milien long PNGEC aninit long 2017 Nesenel Baset.

Dispela mani mak i lukim 40 pesen inkris o i go antap long mani mak PNGEC i bin kisim long ranim 2012 nesenel ileksen.

Mista Gamato i tok K121 milien bilong dispela K400 milien bai go long polis sekyuriti operesen na K297 milien bai go long ranim ileksen operesen.

"Mipela i bin bihainim strongpela polisi bilong yusim mani gut na mekim samting stret. Bi-hain long dispela tupela ileksen, PNGEC i bin sevim sampela mani, na i no yusim moa mani,"

Mista Gamato i tok.

Em i salensim ol wok manmeri bilong PNGEC long bihainim dispela pasin bilong bihainim baset stret na sevim mani.

Mista Gamato i tok PNGEC i bin sevim K1.8 milien long Saut Bogenvil bai-ileksen na K800,000 long Samarai-Murua bai ileksen.

"Yumi (PNGEC) mas kilim dai dispela pasin bilong ol Ilekse Menesa i kisim ol sevis provaida long laik bilong ol yet na pinisim mani nating long sampela ol wok we PNGEC i no nidim long en.

"Olgeta provins bai gat wan wan baset bilong ol long hamas mani ol i laik yusim long taim bilong ilekse, tasol olgeta mani bilong yusim bai stap long han bilong PNGEC hetkwata long Pot Mosbi," Mista Gamato i tok.

Tasol ol wan wan provinsal ileksen menesa bai kisim sampela mani long baim ol buk na stesineri, fiul bilong kar, na mani bilong ranim operesen.

Gamato givim strongpela tok lukaut

SIF Ilektoral Komisina Patalias Gamato i givim wanpela strongpela tok lukaut long ol wok manmeri bilong PNG lektoral Komisina (PNGEC).

Mista Gamato i tokim ol wok manmeri na opisal bilong PNGEC long stopim pasin bilong kisim braiberi, mekim pasin korapsen, mekim paul pilai na i no ken mekim pasin no gut we bai bagarapim nem bilong PNGEC.

"Mi bai no inap isi long ol opisal husat i mekim pasin no gut. Mi laikim ol opisal na wok manmeri bilong PNGEC long bihainim dispel toktok na mekim wok stret bikos mi bai no inap isi long ol," Mista Gamato it ok.

Mista Gamato i tok aninit long lukluk bilong em, em i laikim ol wok



SIF Ilektoral Komisina Patalias Gamato.

manmeri na opisal long senisim pasin no gut bilong ol na stopim pasin bilong mekim paul pasin.

"Bisnis bilong ranim ileksen aninit long lukluk bilong mi bai kamap narapela kain. Ol opisal bilong PNGEC i no ken apim mani mak bilong ol samting.

"Mipela i laik daunim mani mak bilong ol sevis PNGEC bai kisim, na dispel

bai helpim mipela long sevim sampela mani.

"Mi laik toksave gen long yupela ol Provinsal Ilekse Menesa na ol Asisten lekse Menesa long tingting gut na traim long yusim mani gut, we mipela i ken sevim sampela mani.

"Pasin bilong westim mani nating long ol liklik sevis na sampela ol samting we i no nid long ileksen taim, i no ken kamap long dispela ileksen," Mista Gamato i tok.

Mista Gamato i tok bipo nem bilong PNGEC i save bagarap taim ol manmeri i toktok long ileksen frod o paul pilai, vailens o pasin bilong pait na kirapim hevi na birua, na intimidesen o pasin bilong toktok strong na pretim ol manmeri.

Mista Gamato i tok dispela kain pasin no gut i

save kirapim pait na trabel, kamapim hevi, na mekim ileksen i feil, we planti feil ileksen i save go long kot na ileksen petisen.

Mista Gamato i tok planti ol feil ileksen i save go long kot bikos ol wok manmeri na opisal bilong PNGEC i save kisim braiberi mani na i no save mekim wok stret.

"Sapos mi harim olsem wanpela ritening opisa o ileksen menesa i kism braiberi na mekim ol disisen long laik bilong em yet long sapotim kendidet husat i bin givim braiberi long em, mi bai no inap sori long em. Mi bai salim dispel kain opisal na wok manmeri bilong PNGEC i go long polis na larim ol i sasim me aninit long kriminal sas," em i tok.

Ilektoral Komisina gat pawa

ILEKTORAL Komsina Patalias Gamato tasol i gat pawa long stopim o larim ol man husat i gat kriminal rekot long sanap long Nesenel Ilekse long 2017.

Rejistra bilong Politikel Patis na Kendidet, Dokta Alphonse Gelu, i tok PNG i no gat wanpela lo i stopim ol kendidet husat save brukim lo bilong kantri, i gat nem no gut long komyuniti, na i gat kriminel rekot long sosaiti.

"Nau yet i no gat wanpela lo i stap

long stopim ol dispela kain man husat i laik sanap long 2017 Nesenel Ilekse.

"Ilektoral Komisina tasol bai gat pawa long mekim toktok long dispela kain samting. Mipela i no gat pawa bilong lo i no givim tok orait long," Dokta Gelu i tok.

Em i tok planti manmeri na ol kendidet husat i laik sanap long ileksen long neks yia i wok long salim komplein i kam long opis bilong em, tasol opis bilong em i no gat pawa

long mekim dispela wok bilong stopim ol man husat i gat nem no gut.

"Pawa i stap wanstaim Ilektoral Komisina. Tasol long sait bilong lo, i no gat wanpela lo i stap long stopim ol kriminel i sanap long Ilekse," Dokta Gelu i tok.

Sapos wanpela lo bilong stopim ol kriminel i stap, dispela lo bai stopim ol memba husat i bin brukim lo na slip long kalabus long ol i no ken sanap long ileksen.

Soim stretpela pasin long ileksen taim

SIF Ilektoral Komisina Patalias Gamato i laikim olgeta wok manmeri na opisal bilong PNG Ilektoral Komisina (PNGEC) long soim stretpela pasin na mekim wok stret long taim bilong Nesenel Ilekse long neks yia.

Mista Gamato i les long harim o lukim wanpela opisal o wok manmeri bilong PNGEC i kisim braiberi mani, mekim paul pilai na pasin korapsen, na i les long lukim ol opisal i kamapim hevi na birua long taim bilong Ilekse long 2017.

"Mi les long lukim ol wok manmeri bilong Ilektoral Komisina i bikhet na mekim nabaut long taim bilong ileksen. Menesmen bilong mi em i narapela kain na mi bai no inap isi long ol opisal husat i mekim paul pilai," em i tok.

Mista Gamato i givim dispela strongpela tok lukaut long olgeta Provinsal Ilekse Menesa na Asisten Ilekse Menesa, na i laik skruim dispela

toktok i go moa long ol wok manmeri bilong Ilektoral Komisina i stap long olgeta provins na distrik. **Bihain long pinis bilong 2017 Nesenel Ilekse, Mista Gamato i laik lukim;**

- ileksen i bihainim plen na baset mani na ol i kisim bek ol rit pepa insait long taim yet;
- ol Ilekse Menesa i menesim gut na bihain mani plen long yusim K297 milien baset;
- daunim mani mak bilong ileksen operesen long 40 pesen mak (K117 milien);
- mani mak bilong ol bil bilong ol sevis provaida i mas liklik long olgeta provins;
- namba bilong ileksen petisen i no ken go antap;
- ol meri mas vot na i mas go long ol wan wan poling ples long vot; na
- ol manmeri husat i gat disabiliti i mas vot.



**BANK
WHERE
YOU ARE**

A BSP Agent provides you access to basic banking services anywhere in PNG.
Do your banking where you are!



www.bsp.com.pg

Bisnismen soim gutpela pasin long dai bilong Madang stetsmen Sir Angmai

James G. Kila i raitim
WANPELA bisnismen bilong Hailans rijon, husat i gat ol rot bilding na konstraksen kampani Madang i soim stret gutpela pasin taim em i givim helpim long taim bilong dai bilong Madang stetsmen, Sir Angmai Bilas long las wik.

Dispela bisnismen, Dokta Thomas Kainge, i givim K10,000 long las wik Fraide long helpim ol famili bilong leit Sir Angmai Bilas long redim bodi long go long Mosbi long funeral hom na tu

long arapela helpim. Sir Angmai, husat i namba wan MP bilong Madang long Haus ov Asembli long 1968 i kam 1982, na wanpela strongpela man bilong toktok hat tru long developmen. MP bilong Madang na Minista bilong Petroleum na Eneji, Nixon Duban i bin givim helpim las wiken wantaim K20,000 12-pela pig long haus-krai. Dispela helpim bilong Minista Duban i bin kamap taim ol lain famili bilong Sir Angmai i wok long wetim long kam long Madang provinsal gavman, tasol nogat

wanpela toktok i bin kamap long las wik. Mista Duban i tok olsem leit Sir Angmai i bin kamap olsem MP long hatpela taim stret taim PNG bin redi long kisim independens, na kain ol lida long dispela taim i bin givim taim bilong ol long pait strong long bungim ol pipel long sanap strong long lukim kantri muv long kisimk independens. Minista Duban i tok olsem ol lida long pastaim bipo long independens em planti long ol i no save long tok Inglis, tasol ol save wok na tok-

tok strong long bringim developmen long eria bilong ol. Planti ol lokal lida long Madang i amamas long gutpela pasin Dokta Kainge i mekim long givim helpim long famili bilong leit Sir Angmai. Dokta Thomas em i wanpela lokal bisnismen husat i go pas tu long kamapim wanpela nait-klab long Madang taun ol kolim Seafarers Klab, we i lukim em i redi long statim wanpela studio long helpim ol yangpela musikman bilong Madang.



Baksait Wellhead 1A long Angore PDL 8, Wara Tagali na Wara Timalia i ran na ples Anguale i stap long hap, namel long long Angore na Hides 4 PDL 7.

ADR na CVP pulap long lis bilong giaman klen

WANPELA senia opisa bilong Hela Provinsal Gavman i tok planti kain kain giaman nem bilong ol klen o wan pisin i stap long ol klen vet-ing proses (CVP) na oltanativ dispiut risolusen (ADR) i bin kamap long Angore PDL 8 long PNG LNG Projek eria.

Dispela senia opisa, husat i no laik long tokaut long nem bilong em, i tok planti kain kain giaman nem bilong ol klen o wan pisin i pulap long CVP na ADR, na dispela i mekim hat long gavman i pinisim hariap ol wok bilong glasim ol papagraun.

"Mi bin kirap no gut long lukim kain nem bilong klen olsem Mioks Klen, na

Loya Klen, na nem bilong sampela ol ples i stap ausait long Projek eria stret.

"Insait long wanpela liklik ples tasol namel long Wara Timali na Anguale viles tasol, mi kirap no gut long lukim olsem total populesen em i klostu long 5, 000 manmeri.

"Namba bilong klen ol i putim long pepa em sanap klostu long 10. Dispela ples em i wankain olsem Yuni-vesiti ov PNG kempas.

"Katim Fort Bena na IV i go aut. Insait long mein kempas tasol. Dispela kain eria i gat 10-pela klen na 5, 000 manmeri. Dispela em sais bilong Anguale viles.

"Antap long Hela, dispela kain sais bilong ples i save gat wanpela klen tasol na klostu long 20 0 30 manmeri.

"Tasol mi kirap no gut long lukim olsem namba bilong ol manmeri i gro i go antap. Long yia 2000 mi save ran i go kam long dispela ples taim mi bin mekim sampela wok long Komo.

"I no gat wanpela man o meri i save stap long dispela ples Anguale vile. Em i bus ples na no gat wanpela haus i save stap arere long rot.

"Tasol insait long 15 yia tasol, moa long 5, 000 manmeri i kamap na dispela i kamapim 10-pela klen," dispela senia opisa i tok.

Ramu Projek LOA siaman wanbel long noken stopim main operesen

FOAPELA siaman bilong ol lenona sasosen long Ramu Projek long Madang i wanbel long larim maining wok i go het, na bai inap stopim wok.

Ol LOA siaman ya i kamap wantaim wanbel long Tunde, Novemba 15 bihain long ol i bung wantaim Menesing Dairekta bilong Mineral Risoses Atoriti, Philip Samar na divelopa, Ramu NiCo Menesmen (MCC) long Madang.

Ol dispela foapela LOA siaman i makim Kurumbukari LOA, Inlen (Maigari) LOA, Kostal Paipplain LOA na Basamuk LOA.

Miting long Madang i bin kamap bihain long tripela LOA siaman insait long wanpela leta bilong Novemba 9, i givim petisen long gavman na divelopa

long bekim askim bilong ol, o sapos nogat ol bai stopim wok long main.

Ol bikpela askim insait long petisen em long royalti, bisnis developmen grent em K10 milien we nesanel gavman i promis pastaim long givim tasol em faivpela yia nau na nogat samting i kamap, na tu ol i no wanbel long ol bisnis wok ol papagraun no save kisim kam long divelopa.

Tasol miting ol LOA siaman i holim wantaim MRA menesing dairekta, Mista Samar wantaim ol menesmen bilong Ramu NiCo (MCC) i tokaut klia olsem royalti bilong ol papagraun em ol bai kisim klostu taim, tasol pepa wok i go het yet namel long divelopa na MRA wantaim ol loya bilong ol. Miting i tokaut klia olsem long

pastaim divelopa wantaim gavman (MRA) i wok long toktok i go kam long rot long kamap wantaim mak bilong peim royalty. Dispela em bikos fomula bilong wokim kamap mak bilong royalti long peim we i bihainim Main Developmen Kontrak i no givim taim long Kampani long peim royalty bikos prais bilong nikel i daunbilo tru taim kampani i salim nikel i go ovasis.

Olgeta pati o lain husat i stap long miting i wanbel olsem dispela K10 milien bisnis developmen grent em politikol komitmen bilong gavman na olgeta rot ol LOA i traim askim gavman long kisim i hat tumas

Miting i tokaut olsem MRA i mekim wanpela Nesanel Eksekutiv Kaunsil sabmisen o askim bilong Maining minister long bringim i go long Praim Minista na NEC kabinet na nau yet i wetim bekim bilong praim minista

Long sait long spin ov bisnis, olgeta lain long miting i wanbel long bung gen long wanpela miting long Desemba 14 long Madang long toktok long ol samting long sait long bisnis bilong wok ol papagraun i askim long en.

MRA bai putimaut wanpela pepa long tokaut long progrem na wanem samting long toktok long dispela kibung na MCC bai helpim long putimaut ol rivi bilong olgeta kontrak na tokaut long wanem rot ol papagraun ken stap insait long ol bisnis.



Nikel/kobalt maining wok long Kurumbukari main go het long wok.



URGENTLY REQUIRED

Free lance Advertising Sales Representative to sell Space Advertising and Bulk Subscription of Wantokniuspepa to government departments, Business houses, churches, schools & institutions, NGOs and interest individuals in their respective Provinces.

Are you retired, out of work or looking for something to do, this will be an ideal opportunity.

Attractive incentive is available to people who are willing to help themselves at their own time.

Qualifications;

- Previous experience in selling advertising space or related industry but not necessary
- Living in provincial towns with own accommodation
- Own car
- Contactable mobile phone/Emails etc

If you meet the above criteria please send your expression of interest in the first instances to:

The Sales and Marketing Manager, Word Publishing Company Limited. P.O.Box 1982, BOROKO NCD. Ph: 3252500, Mobile Ph. 79187688 or email advertising@wantokniuspepa.com lbents@wantokniuspepa.com

Applications Close 4th of November 2016.

ANY CHEST PAIN CAN BE DANGEROUS

Chest pain comes in many varieties, ranging from a sharp stab to a dull ache. Some chest pain is described as crushing or burning. In certain cases, the pain travels up the neck, into the jaw, and then radiates through to the back or down one or both arms.

Many different problems can cause chest pain. The most life-threatening ones involve the heart or lungs. Because it can be difficult to determine the exact cause of chest pain, it's best to seek immediate medical help

Symptoms

A wide range of health problems can cause chest pain. In many cases, the underlying cause has nothing to do with your heart — though there's no easy way to tell without seeing a doctor.

Heart-related chest pain

Although chest pain is commonly attributed to heart disease, many people with heart disease say they experience a vague discomfort for which "pain" doesn't seem to be an adequate description. In general, chest discomfort related to a heart attack or another heart problem may be described by or associated with one or more of the following:

Pressure, fullness or tightness in your chest

Crushing or searing pain that radiates to your back, neck, jaw, shoulders and arms — particularly your left arm

Pain that lasts more than a few minutes, gets worse with activity, goes away and comes back or varies in intensity

Shortness of breath

Cold sweats

Dizziness or weakness

Nausea or vomiting

Other types of chest pain

It can be difficult to distinguish chest pain due to a heart problem from other types of chest pain. However, chest pain that is less likely due to a heart problem is more often associated with:

A sour taste or a sensation of

food re-entering your mouth

Trouble swallowing

Pain that gets better or worse when you change your body position

Pain that intensifies when you breathe deeply or cough

Tenderness when you push on your chest

The classic symptoms of heartburn — a painful, burning sensation behind your breastbone — can be caused by problems with your heart or your stomach.

When to see a doctor

If you have new or unexplained chest pain or suspect you're having a heart attack, call for emergency medical help immediately.

Causes

Chest pain has many possible causes, all of which deserve medical attention.

Heart-related causes

Examples of heart-related causes of chest pain include:

Heart attack. A heart attack is a result of a blood clot that's blocking blood flow to your heart muscle.

Angina. Thick plaques can gradually build up on the inner walls of the arteries that carry blood to your heart. These plaques narrow the arteries and restrict the heart's blood supply, particularly during exertion.

Aortic dissection. This life-threatening condition involves the main artery leading from your heart — your aorta. If the inner layers of this blood vessel separate, blood will be forced between the layers and can cause the aorta to rupture.

Pericarditis. This condition, an inflammation of the sac surrounding your heart, usually causes sharp pain that gets worse when you breathe in or when you lay down.

Digestive causes

Chest pain can be caused by disorders of the digestive system, including:

Heartburn. This painful, burning sensation behind your breastbone occurs when stomach acid washes up from your stomach into the esophagus — the tube that connects your throat to your stomach.

Swallowing disorders. Disorders of the esophagus can make swallowing difficult and even painful.

Gallbladder or pancreas problems. Gallstones or inflammation of your gallbladder or pancreas can cause abdominal pain that radiates to your chest.

Muscle and bone causes

Some types of chest pain are associated with injuries and other problems affecting the structures that make up the chest wall. Examples include:

Costochondritis. In this condition, the cartilage of your rib cage, particularly the cartilage that joins your ribs to your breastbone, becomes inflamed and painful.

Sore muscles. Chronic pain syndromes, such as fibromyalgia, can produce persistent muscle-related chest pain.

Injured ribs. A bruised or broken rib can cause chest pain.

Lung-related causes

Many lung disorders can cause chest pain, including:

Pulmonary embolism. This cause of chest pain occurs when a blood clot becomes lodged in a lung (pulmonary) artery, blocking blood flow to lung tissue.

Pleurisy. If the membrane that covers your lungs becomes inflamed, it can cause chest pain that's made worse when you inhale or cough.

Collapsed lung. The chest pain associated with a collapsed lung typically begins suddenly and can last for hours. A collapsed lung occurs when air leaks into the space between the lung and the ribs.

Pulmonary hypertension. High blood pressure in the arteries carrying blood to the lungs (pulmonary hypertension) also can produce chest pain.

Other causes

Chest pain can also be caused by:

Panic attack. If you have periods of intense fear accompanied by chest pain, rapid heartbeat, rapid breathing, profuse sweating, shortness of breath, nausea, dizziness and a fear of dying, you may be experiencing a panic attack.

Shingles. Caused by a reactivation of the chickenpox virus, shingles can produce pain and a band of blisters from your back around to your chest wall.

Chest pain doesn't always signal a heart attack. But that's what emergency room doctors will test for first because it's potentially the most immediate threat to your life. They may also check for life-threatening lung conditions — such as a collapsed lung or a clot in your lung.

Tests & Diagnosis

Immediate tests

Some of the first tests you may undergo include:

Electrocardiogram (ECG). This test records the electrical activity of your heart through electrodes attached to your skin. Because injured heart muscle doesn't conduct electrical impulses normally, the ECG may show that a heart attack has occurred or is in progress.

Blood tests. Your doctor may order blood tests to check for increased levels of certain enzymes normally found in heart muscle. Damage to heart cells from a heart attack may allow these enzymes to leak, over a period of hours, into your blood.

Chest X-ray. An X-ray of your chest allows doctors to check the condition of your lungs and the size and shape of your heart and major blood vessels. A chest X-ray can also reveal lung problems such as pneumonia or a collapsed lung.

Computerized tomography (CT scan). CT scans can be used to look for a blood clot in your lung (pulmonary embolism) or to check your aorta to make sure you're not having aortic dissection.

Follow-up testing

Depending upon the results from these initial tests, you may need follow-up testing, which may include:

Echocardiogram. An echocardiogram uses sound waves to produce a video image of your heart in motion. In some cases, a small device may be passed down your throat to obtain better views of different parts of your heart.

Computerized tomography (CT scan). Different types of CT scans can be used to check your heart arteries for signs of calcium, which indicate areas where plaque blockages are accumulating. CT scans can also be done with dye to check your heart and lung arteries for blockages and other problems.

Stress tests. These measure how your heart and blood vessels respond to exertion, which may indicate if your pain is related to your heart. There are many kinds of stress tests.

You may be asked to walk on a treadmill or pedal a stationary bike while hooked up to an ECG. Or you may be given a drug intravenously to stimulate your heart in a way similar to exercise.

Coronary catheterization (angiogram). This test helps doctors identify individual arteries to your heart that may be narrowed or blocked. A liquid dye is injected into the arteries of your heart through a catheter — a long, thin tube that's fed through an artery, either through your wrist or your groin, to arteries in your heart. As the dye fills your arteries, they become visible on X-ray and video.

Chest Pain can mean a number of things. PIH has started a CHEST PAIN CLINIC at its 3 Mile campus, where a specialist in Chest Pain will be offering free consultation to people who suffer symptoms of chest pain.

Please call and book your appointment for a FREE consultation by dialling 79988000.

**ANY CHEST PAIN
CAN BE
DANGEROUS**



PIH CHEST PAIN CLINIC

If you are facing any of these problems:

- Chest pain
- Chronic Coughing
- Difficulty in Breathing
- Blood in Sputum

Call for
FREE
Consultation

79988000

Long Ailan Wod kaunsila i les long tok promis nating

Tingim Sir Angmai Bilas

James G. Kila i raitim

WOD 32 kaunsila bilong Saidor Lokal Level Gavman (LLG) we i lukautim Long Ailan long Madang provins i mekim bikipela tok lukaut long ol lain husat i laik resis long 2017 nesenel ileksen long no ken i go givim giaman tok promis long ol pipel bilong em.

LLG Wod 32 kaunsila, Mathias Korima i tok olsem planti ol kendidet long bipo i save go long Long Ailan na givim ol giaman tok promis long ol pipel bilong em long wokim rot, wokim skul na haus sik na givim ol arapela sevis tasol i no gat samting i save kamap.

Korima i tok ol pipel bilong em nau i stap olsem no gat papa o mama, bikos Madang provinsal gavman i no gat luksave long ol.

Em i bin tokaut long midia long las wik Trinde, olsem planti taim ol rijonal na Raikos Open ilektoret kendidet i save yusim pipel bilong em long kisim namba, tasol bihain ol i kisim pawa ol i no save bringim sevis i go



Viles komyuniti bilong Matapun ples long Long Ailan i bung long harim wanpela awenes toktok las wik antap. Poto: James G. Kila

long ol pipel long ol.

Long Ailan i go aninit long wod 32 bilong Saidor LLG long Raikos distrik long Madang provins, na em i wanpela ailan we i stap longwe tru long taun na i no gat gutpela helpim na sevis bilong gavman i save go long helpim ol dispela pipel.

Mista Korima i tok, maski olsem i gat planti ples na ol manmeri long dispela bikipela ailan,

Madang gavman long provins i no save givim inap luksave na helpim i go long ol dispela ailan pipel.

Em i tokaut olsem wanpela rot tasol em ol pipel save kisim mani long helpim sindaun bilong ol em long salim kopra na salim buai, taim em i sisen bilong buai.

"No gat mobail netwok i go long ailan bilong mipela. Mipela olsem lain

no gat papamama na gavman bilong Madang i no gat luksave tru long mipela," Korima i tok.

Em i tokaut olsem long bipo yet ol Kendiket bilong Madang rijonal na Raikos open i save go long Long Ailan na givim planti kain kain mauswara na promis olsem ol bai wokim ring rot raunim ailan na wokim ples balus na nupela skul na ol arapela samting. Tasol inap

tude, nogat ol dispela toktok bilong ol i karim kaikai. Olgeta em giaman toktok tasol.

Mista Korima i tokaut tu olsem long 2012 bihain long nau Madang Gavana, Jim Kas i bin winim ileksen, em i mekim wanpela pablik tokaut long Laiwaden oval olsem em bai bungim tupela ailan bilong Madang, em Bagabag Ailan wantaim Long Ailan long kamap wanpela LLG.

"Dispela toktok bilong gavana Jim Kas i no karim kaikai na klostu nau bai ileksen bilong 2017 bai kamap," Korima i tok.

Em i tokaut tu olsem Madang gavana Kas i bin toktok bihain long em i winim ileksen long wokim nupela hausik long Long ailan, tasol dispela toktok tu i no karim kaikai.

Korima i tok olsem ileksen kempein taim i no stat yet tasol em i tokaut olsem husat lain i laik go kempen long Long Ailan mas no ken givim kain kain ol mauswara o giaman promis. Ol mas tok tru na tokaut long wanem ekspiriens o wok ol i mekim

Ahimsa Kibikibi i raitim

GAVANA bilong Nu Ailan, Sir Julius Chan i salim bikipela tok sori i go long famili, ol bisnis na wanpinis bilong Sir Angmai Bilas, wanpela bikman long ples na memba bilong Parliamen bipo bilong Madang Provins, husat i bin dai las wik.

Sir Julius i salim toktok i go long poroman na pastaim minista bilong Woks, Peter Yama. Sir Julius i tok Sir Angmai i bin gutpela poroman bilong em na i bin strongpela sapota bilong Pipels Progres Pati long taim bilong em long politiks.

Sir Angmai i bin wanpela man tu planti i bin gat bikipela rispek long em na em i bin givim laip bilong em tru long pipel.

"Mi lusim gutpela poroman na kantri nau i lusim wanpela lida, " Sir Julius i tok. Mi tingim em olsem Minista bilong Tred husat i bin wok hat tru long putim pipel na kantri i go pas.

Mista Yama i bin givim toktok bilong Sir Julius Chan i go long famili bilong Sir Angmai, wantaim pik na kaikai long makim dai bilong wanpela gutpela lida bilong Madang na Papua Niugini tu.

AU\$ 10 milien wanbel i kamap long pepa

Frieda Sila Kana i raitim

AUSTRALIA Gavman wantaim PNG Nesenel Plening na Monitoring Dipatmen i bin sainim wanpela agri-men wantaim Yunaitet Nesens Populesen Fan (UNFPA) long Tunde long pasim toktok bilong mani we bai helpim long mekim wok bilong wanpela Demograpik Haushold Sevei (DHS) nau i wok long ran insait long ol 22 provins bilong kantri.

Dispela DHS em i bin stat long mun Septemba wantaim trening bilong ol lain bilong wokim ol intaviu na wok i stat pinis, nau ol 400 wokman na meri i stap long planti hap bilong ol 22 provins.

Minista bilong Nesenel Plening na Monitoring na Rurel Implementesen na Developmen, Charles Abel i bin tok tenkyu long Foren Afeas Minista bilong Australia Julie Bishop long gutpela helpim bilong Australia gavman na ol pipel bilong Australia.

"Mi laik tok tenkyu long Foren Afeas Minista, Julie Bishop long wanem mi bin tokim em long helpim long las foram. Na mi save olsem long toktok bilong em i strongim tingting bilong Australia



L-R Seketeri Hakaua Harry, wanpela bikmeri makim Australia Hai Komisina, Minista Charles Abel, wantaim Minista bilong Helt na HIV/AIDS, Michael Malabag na hetman bilong UNFPA long kantri, Dokta Koffie Kouame i sainim ol pepa bilong strongim kontrak bilong AUD\$10 milien long ranim DHS sevei long kantri. Poto: Frieda Sila Kana

gavman long givim dispela \$10 milien long ranim dispela projek," Mista Abel i tok.

Em i tok sevei bilong DHS i wok long ran gut nau wantaim 400 man na meri wok long mekim ol intaviu long kisim 800 haus.

"Maski sampela liklik hevi i

kamap long namel olsem ol wokman na wokmeri i no kisim Travel Alawens na wok i bam liklik tasol nau ol i wok long stretim na mi laik strongim tingting bilong ol pipel olsem em i wanpela bikipela wok olsem na mipela i kisim ol yangpela man na meri long wok," Mista

Abel i tok.

Em i tok dispela Demograpik Haus hold sevei em i wanpela bilong ol bikipela sevei we i wok long kamap nau wantaim ol narapela. Kain sevei bilong save long ol kain sindaun na laip bilong ol pipel na ol narapela samting olsem ol kain

kain sik em i save kamap long olgeta 10-pela yia. Ol i save wokim sampel sevei tasol na bringim mak bilong ol statistik bilong kantri i go kamap long standet bilong wol.

Nesenel Statistik Opis em i go pas long kodine-tim dispela sevei wok.

"Mipela laikim gutpela ripot bilong ol pipel i mas i stap pastaim long O'Neill-Dion gavman bai pinisim wok bilong dispela gavman.

Mipela i laikim olsem ol statistik bilong mipela bai kamap wankain olsem long ol narapela kantri long helpim narapela gavman bihain long mekim gut plen na mekim wok long helpim gut ol pipel," Minista Abel i tok.

I gat ol narapela patna i helpim olsem Wol Helt Ogenais-esen, UNICEF na ol narapela lain wantaim teknikel na risos wantaim liklik mani tu.

PNG Gavman yet i putim K1milien long helpim dispela Demograpik Haus Sevei long kamap.

Planti lain i bungim han long BSP Klinap De

PLANTI tausen
sumatin insait long
Pasifik i bin bungim
han wantaim long
wokim klinap wantaim
2016 BSP Go Grin
Enuel Klinap long
Fraide 18 Novemba,
2016.

Dispela taim bilong
klinap em i lukluk long
skulim na mekim samt-
ing.

"Mipela lainim ol
pikinini long save
olsem ol i gat wok long
lukautim ples na
mipela i go pas long ol
long wanpela de bilong
klinim skul bilong ol na
komyuniti arere," BSP
Kopret Sponsasip
Menesa, Rosemary
Mawe i tok.

BSP Go Gin 2016 het
tok em i olsem, 'Recy-
cle, Reuse, Respect'.

Long 2016, BSP Fiji i
wokim pinis klinap
kempen bilong ol long
Septemba na BSP
Tonga i wokim klinap
de bilong ol long Fonde
10 Novemba na Samoa
long Fraide 11 No-

vemba. PNG,
Solomon Islands, Vanu-
atu na Cook Islands
holim klinap de bilong
ol long Fraide 18 No-
vemba.

"BSP em amamas
long stap wantaim
komyuniti na bai wok
long strongim yet Go
Grin tok save long
givim tingting long ol
komyuniti na pikinini
long wei bilong rispek
na long larim ol rot i
stap gut na no gat
pipia.

"Gutpela samting ol-
geta lain bai kisim em
klinpela komyuniti na
ol sumatin bai lain long
lukautim envairomen,"
Mis Mawe i tok.

Dispela wok bilong
olgeta yia i bin stat
long yia 2010 insait
long PNG, Fiji na
Solomon Islands, na
Cook Islands, Samoa na
Tonga i kam insait long
2015. Vanuatu bai
bung wantaim BSP
Pasifik long namba
wan taim long dispela
yia wantaim Go Grin

klinap kempen.

BSP i gat Go Grin kalenda,
we i save sapotim ol skul na
komyuniti grup long klinap
wok na benk i save givim ol
beg, hanglap na ol samting bi-
long salim long helpim dispela
de.

BSP PR UNIT.
Bavaroko Ele-
mentri Skul
sumatin long Pot
Mosbi, taim ol i
bin wokim klinap
long 2015 Go
Grin.



Oil Search na ExxonMobil salim 20 pesen intres

TUPELA biknen oil na ges kampani long PNG
petroleum indastri, Oil Search Limited na ExxnMobil
Corporation, i wanbel long salim 20 pesen intres bi-
long tupela long Petroleum Prospekting Laisens
(PPL) 402.

Tupela kampani i salim 20 pesen bilong PPL 402
long Barracuda Limited. Barracuda em i wanpela
sabsideri kampani bilong Santos Limited bilong Aus-
tralia.

Oil Search (PNG) Limited bai holim 37.5 pesen in-
tres taim sabsideri kampani bilong ExxonMobil,
Esso PNG Wren Limited, bai holim yet 42.5 pesen
intres.

PPL 402 i stap 40 kilomita notwes long Hides ges
fil na prodaksen fasiliti long Hela. Dispela laisens i
karamapim 510 skaia kilomita.

Dispela ples i stap long eria we planti ges i stap
long en na i luk olsem ol bai kisim sampela moa ges
tu long dispela laisens eria long joinim PNG LNG
Projek.

Barracuda nau bai gat sans long kamap olsem
wanpela projek patna long kirapim Muruk 1 well
long dispela PPL 402.

Murku 1 wel i laik kamaulim tu trilian kiubik fit
bilong ges, we i stap tamblo tru long 3, 450 mita.

Dispela ples we ol i laik mekim ol drill wok na
kisim ges em i stap namel long Hela na Westen
provins.

Muruk 1 inap long gat moa ges na sapos ges i
stap, i luk olsem ol bai joinim wantaim ges i kam
long P'nyang na kamapim namba tri tren bilong
PNG LNG Projek.

Menesing Dairekta bilong Oil Search, Peter Bot-
ten, i tok ol i bihainim plen bilong kampani long
wokbung wantaim ol wan wan projek patna bilong
ol.

"Mipela i les long karim hevi long mipela yet.
Mipela i putim intres bilong ol seaholda i go pas na
daunim level bilong hevi na risk," Mista Botten i tok.



PNG Air

CENTRAL RESERVATIONS


Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg



Japan wantaim Canada



USA wantaim Ghana



Venezuela wantaim Korea



USA wantaim Ghana



German wantaim Mexico



FIFA WOMEN'S WORLD CUP 2015

KAP ANDA MERI EKSEN

Ol pul Gem pinis - 8-pela tim go long fainal

Nicky Bernard i raitim

OLGETA gem long wan wan pul i pinis longdispela wik Mande na ol tim we i stap long top 2 long wan wan pul bai salens gen long ol na painim husat top 4 bai go long fainel bilong Anda 20 Women's Wol Kap Soka bilong 2016 long Mosbi. Long Sande pilai long Nesenel Futbal Stadium namel long Japan na Canada, Japan i bin strong tumas long ol yangpela bilong Canada na ol i daunim ol long 5-0 long pul B. Long pul A, Not Korea i bin strong tumas

long ol meri PNG na daunim ol long 7-1. Dispela gem em PNG i bin putim mak long skoa bihain ol geta narapela pilai bilong ol namel long ol narapela tim long pul bilong ol. Sande tu i bin gat tupela pilai i kamap long PNG Futbal Stadium long Waigani long Mosbi. Dispela tupela pilai i stapela namel long Brazil na Sweden long pul A. Dispela pilai i bin strong stret namel long tupela tim wantaim na tupela i bin dro 1-1 taim pilai i pinis. Na nara-pela pilai namel long Nigeria na

Spain long pul B, Nigeria bin strong na daunim ol Spain 2-1. Mande em laspela de bilong pilai bilong ol pul resis, long Sir John Guise Stadium na i bin lukim tupela pilai i kamap. Long namba wan pilai namel long Ghana na USA, tupela tim wantaim i soim strong bilong tupela na strong bilong tupela i mekim tupela i dro 1-1. Ghana nau i aut long resis. USA nau i go pas long pul C na bai go insait long kwata fainel long pilai egensim Mexico husat i stap namba tu long pul D long kwata fainal.

Nambu tu pilai namel long Germany na Korea, Germany i winim Korea Republic 2-0. Germany i go pas long pul D na bai pilai egensim France husat i stap namba tu long pul C kwata fainel long Fraide 25 long Sir John Guise Stadium. Ol tim husat i aut long resis nau em Sweden na PNG long pul A, Nigeria na Canada long pul B, New Zealand na Ghana long C na long pul D, em Korea Republic na Venezuela. Ol tim i go insait long kwata fainal em pul A. N.Korea na Brazil, long pul B em Japan na

Spain, long pul C em USA na France na long pul D em Germany na Mexico. Dispela ol tim husat i stap long kwata fainal bai pilai olsem namba wan tim long pul A bai pilaim namba tu bilong pul B. Namba wan bilong pul B bai pilai namba tu bilong pul B. Long pul C na D bai wankain pilai tu ol bai mekim olsem pul A na B na wina bai go pilai long narapela raun fainal. Desemba 3 bai gren fainel bai kamap long Nesenel Futbal Stadium.



PNG wantaim Korea



Tim Korea



Tim PNG Selebret

De La Salle Sekenderi opim pis fam trening

Paul Zuvani i raitim
DE La Salle Sekenderi
skul long Bomana, au-
sait long Mosbi i opim
K62,000 pis fam trening
senta long las wik.

Dispela pis fam o akuakalsa trening senta em Nesenel Piseris Atoriti (NFA) i helpim long kamapim.

Minista bilong Piseris i no bin inap long kamap na NFA Menesing Dairekta, John Kasu i opim.

Mista Kasu i tok NFA i kamap wantaim planti ol program long strongim wok bilong piseris na wanpela em long lainim ol manmeri long bisnis developmen na menesmen wok.

“Hap bilong dispela em long trening ol manmeri na moa long ol yangpela em ol sumatin,” em i tok.

“Mipela i laik trenim ol manmeri husat em i bikpela risos long kantri.

“Mipela i ranim ol pis faming program wantaim skul na dispela em mipela i ranim long De La Salle.

“Dispela program i bikpela samting na yupela ol sumatin i lidaman bilong bihain taim.

Em i tok ol i wok wantaim ol arapela gavman ejensi olsem Edukesen na Smol-Midium Entapraises (SME) long ranim program.

“Planti lain i save ting i gat planti pis long solwara, tasol dispela i no tru.

“Planti manmeri i wok long kisim pis long solwara na wara wantaim na namba bilong ol pis i pinis.

“Long dispela as mipela (NFA) i wok hat long pasim sampela hap bilong larim pis i gro na traim long kamapim ol wok long groim ol pis.”

Em i tok akuakalsa i wanpela wok bilong groim pis.

Narapela hap em i pas olsem ol i pasim pis-lama long kantri.

Misis Violet Gerega, dairekta bilong teknikal vokesenel edukesen trening (TVET) Karikulum Non-Trades, i tok ol bai kamapim sampela ol program we ol i save ranim long ol TVET skul long ol sekenderi na ol arapela bikpela skul.

Dispela ol program em long skul bilong lainim long lukautim pis na bilong Know About Business (KAB).

“Dispela em bikpela de bilong amamas bikos skul i kamapim bikpela wok,” Gerega i tok.

“Edukesen Dipatmen aninit long praimer sekta i kamapim ol skul long wok bilong egrikalsa, forestri na piseris long bungim laik i stap long leba maket.

“Mipela i mas bungim diman i stap bikos namba bilong ol manmeri i kamap bikpela na laik bilong ol long yusim ol samting tu i kamap bikpela olgeta taim.”

De La Salle Sekendari skul Prinsipel, James Ume, i bin amamas tru na i tok tenkyu long NFA long sapot bilong em.

Em i tok skul bai statim ol wok bilong em taim edukesen skul yia i stat long 2017.

Ol wankain skul ol sumatin bai lain olsem ol sumatin i save lainim long ol TVET skul (vokesinel senta).

Tingting bilong kisim save long lukautim pis i kam long skul yet.

Dispela i mekim De La Salle i namba wan Sekenderi Skul long kantri long kisim ol sabjek o save bilong lukautim pis wantaim ol nupela samting.



John Kasu, NFA Menesing Dairekta i opim pis fam long De La Salle.

NESA
PNG FOAM

FOAM PRODUCTS
MANUFACTURER AND DISTRIBUTOR

pikinini

Krismas i kam klostu nau

Hamamasim
ol pikinini bilong
yupela wantaim
ol samting
igat mak blong
Nesa PNG Foam

PNG MADE
100% Nationally Owned

Baim ol samting igat mak blong NESA
long ol dispela gutpela stoa.

• *Gutpela na Strongpela* • *Bai Stap Longpela Taim* • *Pilim Gutpela Moa*

Mobile: +675 79007548 | Phone: +675 325 0822 | Email: sales@nesafoam.com.pg
PO BOX 2030 BOROKO NCD, PAPUA NEW GUINEA. OFFICE LOCATION: SECTION 55 ALLOTMENT 16 AGO STREET, GORDONS



TINGTING bilong ileksen 2017 em i sanap nau na planti toktok i go i kam long husat i ken ran na husat i no ken ran. Gavman i putim tu draipela nominesen fi.

Yumi skelim bilong wanem tru na yumi gat gavman? Em i stap long lukautim husat?

Yumi skelim tu husat tru em i lida tru na husat em i politisen nating. Yumi save lida em i save pulap long gutpela tingting na save na i no save tingim em yet pas. Em i save olgeta samting em i mekim i mas bringim gutpela bilong ol pipel bilong em.

Planti politisen i raun. Sampela i save kamap long ples long taim bilong ileksen tasol. Ol i save kam mekim planti naispela gris stori na i save tasim bel bilong yumi ol vota gut tru. Taim ileksen i pinis na ol i win em yumi no save lukim ol gen inap narapela ileksen gen.

Lida tru i save givim planti taim long ol pipel bilong em. Em i save lukluk long wanem ol rot em inap yusim ol risos long bringim gutpela sindaun.

Sapos yumi olgeta i tok yumi bilong Papua Niugini tasol ol mani man na meri tasol i ken ran long ileksen dispela em i min wanem?

Yes, yumi ken lukim ol mani man na meri i laik holim strong tru dispela pawa we opis bilong ol olsem memba bilong ilektoret i givim ol. Dispela kain ol lain husat i hangre tru long pawa em ol i lida o nogat?

Ileksen 2017- husat bai sanap?

I gat narapela lain grup i stap husat i wari tru long ol pipel na risos bilong dispela kantri. Ol i save toktok planti long pasin bilong ol memba. Ol i ting sapos ol i go insait long palamen sampela gutpela senis bai i kamap. Tasol planti dispela ol lain i no gat mani.

Sampela taim yumi save kirap nogut yumi lukim wanpela long ples i save ran long ileksen. Hariap tru yumi save skelim dispela man o meri na tok, ‘wanem kain save em i gat? Hamas mani em i gat?’ Long ples dispela man i win tru. Olgeta lain long ol ples i laikim em tasol taim em i resis em i no save kisim planti vot.

Long taim bilong vot yumi save bihainim ol famili, klen o ol poro na makim lida. Planti taim yumi save lusim tingting long ol wari bilong yumi. Insait long 4-pela yia bipo long ileksen yumi save krai long haus sik, skul, rot na bris. Tasol taim ileksen i kam yumi save lusim tingting long dispela olgeta samting na yumi vot nating tasol.

Kain ol longlong pasin bilong vot i no inap helpim yumi. Nau dispela taim ol vota i gat bikpela salens tru long makim ol lida we i gat bel sori long ol pipel bilong em na i gat strong long sanap na makim gut ol pipel.

Yumi save planti ol politisen bilong yumi i karim nem nating. Olgeta disisen i save kam long narapela hap. Dispela i save mekim na planti pipel i stap yet long bagarap.

Ol lapun i save tok, gutpela taim i go pinis we gavman i no bin i gat planti mani tasol em i bin mekim planti gutpela wok. Ol ekstensen opisa bilong helt na egrikalsa i save go raun long ol ples na helpim ol pipel. Ol haus sik i save gat wokman na wokmeri na marasin, ol tisa i save mekim tru wok tisa na ol lida i save rispek na givim luksave long dispela ol wok.

Ileksen 2017 i kamap klostu. Em i taim yumi tingting gut tru wanem kain gavman yumi laikim na yumi ken skelim gut tru ol kendidet bipo long yumi makim ol.

Save na Mekim

Sapta 2

...moa yet long hap 1 (Poteto)

Kaikai bilong givim strong POTETO

Lukim moa hap bilong tok bilong planim long rot bilong didiman daunbilo

6. Kamautim na putim gut.

Lip na stik bilong poteto i mas drai pinis pastaim, em nau, poteto i redi bilong kamautim. Sapos lip na stik i no drai yet na yu kamautim kwik, bai skin bilong poteto i no strong na poteto i no inap i stap gut na winim longpela taim.

Lip bilong poteto i mas drai olgeta pastaim, bihain yu ken kamautim kaikai bilong en na bai i stap gut. Yu ken kamautim long spet, o long fok. Sutim spet o fok i go aninit olgeta na apim poteto wantaim graun. Was gut na skin bilong poteto i no ken tekewe nabaut. Nogut skin i tekewe na bai poteto i no inap i stap longpela taim.

Kamautim pinis, putim long ples kol, inap graun i drai. Yu no ken putim long san, yu no ken wasim long wara. Drai pinis, orait, putim gut long ples bilong em.

Dispela ples i mas drai gut, na tudak liklik, na win i mas go i kam long en. Em bai poteto inap i stap 2-pela 0 3-pela mun samting.

Tok bilong planim poteto long pasin bilong ples Narapela rot bilong planim poteto i stap. Ol i wokim long maunten bilong Morobe Provins na long Raikos long Madang Provins.

Bipo long woa, wanpela misinari i kisim pikinini poteto i kam, na em i planim. Ol manmeri i kisim long dispela na planim long ples. Bihain ol i kisim pikinini poteto long gaden bilong ol yet, olsem man i kisim stik taro na stik yam.

Ol i putim gutpela gutpela pikinini poteto i slip long ples kol na drai, inap kru i kamap, orait, ol i planim long gaden bipo ol i bin redim gut graun bilong en.

Tok bilong planim klostu long haus

Sapos yu laik planim poteto long olupela gaden arere long haus, em tu inap. Em bai yu planim wantaim kompos. Tasol was gut long yu bin wokim kompos gut wantaim pekpek bilong pik na kakaruk, na kompos i sting olgeta na i kamap graun pinis olgeta. Em bai kompos i helpim poteto bilong yu gut tru na i no gat plantim sik na binatang i kamap.



Las pikinini bilong Blessed Peter ToRot i dai



Rufina wantaim kasen bilong em, Bisop Rockus Tatamai msc, em bisop bilong Bereina Daiosis.



Rufina i kisim blesing long Pope John Paul 2 long misa lotu bilong santuim papa bilong em long Sir John Guise Stediam long Janueri 1995.

LAS wik Rufina laMama em las pikinini bilong namba wan santu bilong Katolik Sios long PNG, BlesetdPeter ToRot i dai.

Rufina em i mama na bubu na em i bilong ples Rakunai, ples bilong Peter ToRot tu,

insait long Is Nu Briten Provins. Rufina i bin sik llongpela taim na i dai.

Dispela sori nius i kirapim gen ol hop na prea long de we sios bai mekim Blesed Peter ToRot i kamap santu.

Blesed Peter ToRot em i

katekis na matir long digniti bilong famili laip na Sakramen bilong Marit olsem wanpela santu samting.

Long Janueri 17, 1995, long Sir John Guise Stediam we Pope John Paul 2 i bin go pas long wokim bikpela misa lotu

long santuim Peter ToRot, Rufina i bin wanpela long ol i bin wokim prisentesen i go long Pope.

Olsem las pikinini bilong bikman bilong sios ya, bikpela luksave i bin go long Rufina.

Ol Japan soka pilaia sapatim Sanap Wantaim Program



U 20 Wol Kap wimens soka tim bilong Japan i sapatim Sanap Wantaim Program.

PLANTI sapat i go long ol meri na ol gels long PNG egensim vailens na pasin bilong mekim ol no gut, na long ol i mas stap seif na sanap long ol rait bilong ol.

Ol meri i bin kam long ol ovasis kantri long pilai long U20 Wol Kap Soka resis i givim sapat long ol yangpela meri na ol gels long PNG.

Tim U20 bilong Japan i wanpela long ol yangpela meri pilaia husat i sapatim ol meri PNG.

Pastaim long ol pilai i bin stat long las wik, Japan U-20 Women's National Team i

bin sanap wantaim na tok ol i joinim ol PNG yut long mekim ol pablik spes i seif long ol meri na gel bilong PNG. Na ol i tok "YumiSanap-Wantaim."

"Komitmen bilong ol Japan U-20 Women's National Team long joinim ol yut bilong yumi i bikpela na gutpela samting," Gavana bilong NCD, Powes Parkop i bin tok.

Em i skruim tok na i tok long PNG, ol meri i save go pas long ol senis i kamap long laip bilong ol, long ol wan wan haus, ol komyuniti, ol

siti na kantri.

"Ol i wok long go pas long ol nupela samting na ol dispela em, bihain taim we ol yangpela bilong yumi n a moa yet, ol meri i ken stap seif na kisim wankain luksave olsem ol man," Mista Parkop i bin tok.

Tim Kepten bilong Japan, Norimatsu Ruka, i bin tok tim bilong mipela i sanap wantaim ol yangpela man na meri bilong PNG husat i wok hat long mekim ol ples, komyuniti, siti na kantri i seif long ol meri na ol gel.

Mipela i tok," 'YumiSanap-

Wantaim!'", Mis Ruka i bin tok.

"Pipel i tok yumi ol sempion taim mipela i winim gem, tasol yumi ol trupela sempion taim yumi wok wantaim long kamapim senis long wol, Mis Ruka i tok.

UNDP Kantri Dairekta, Dokta Jeffrey Buchanan i amamas long olgeta U20 Soka Wol Kap tim i kam long ol 14 15 kantri i sapatim "Sanapwantaim" program, na em i tok dispela i gutpela stret bikos ol yangpela etlit i joinim yumi long mekim wol i seif ples long ol meri na gel.

YWAM medikal sip i go long Kiriwina-Goodenough

YWAM Trening na Medikal Sip, MV YWAM PNG i go kamap long Kiriwina Ailan long Sande wik i go pinis, long statim tupela wik wok bung wantaim autris patrol long Kiriwina-Goodenough Distrik.

Dispela ran em i kamap bihain tasol long wanpela gutpela wok raun i go long Galp Pro vins.

Taim MV YWAM PNG i kamap long Kaibola long Sande 13 Novemba, Membra bilong Kiriwina-Goodenough Open Ilekto ret, na Minista bilong Forestri, Douglas Tomuriesa, i bin stap long kisim sip wantaim ol volantia bilong en.

Mista Tomuriesa i bin givim wanpela sek wantaim mani mak bilong K100,000 i go long YWAM Medikal Sips long nem bilong bilong Kiriwina-Goodenough Distrik Developmen Atoriti (DDA), long inapim tok promis bilong ol long helpim long enuel operesen eks pens bilong sip, MV YWAM PNG.

Long taim bilong tok welkam na givim sek, Minista Tomuriesa i tok tenkyu long wok patnasip bilong Kiriwina-Goodenough DDA wantaim YWAM Medikal Sip na long i tok olsem ol pipel bilong em i bin wet longpela taim long lukim kain sevis olsem i kamap.

YWAM Medikal Sip Menesing Dairekta, Ken Mulligan, i tok em i



YWAM Trening na Medikal Sip, MV YWAM PNG i kamap long Kiriwina na Minista Douglas Tomuriesa i sekhan long John Dawson bilong YWAM Medikal na Trening Sip.

amamas long DDA i sapotim wok bilong ol long Kiriwina wantiam moa long 100 volantia i kam long 13 kain kain kantri.

“Long bel bilong mi, mi amamas long stap long dispela hap nau.

Long mipela i kam long dispela ailan em i wanpela presen long mipela. Mipela i bin kam long hia wantaim MV Pasifik Link long 2014 na nau mipela i kam bek wantaim bikipela moa sip. Mipela i gat



Ol DDA i givim sek mani K100,000 bilong DSIP i go long YWAM Medikal na Trening Sip long mekim wok insait long Kiriwina-Goodenough Distrik.

bikipela amamas long mipela i no lukim olsem em i samting nating,” Mista Mulligan i tok.

“Mipela i bin inap long lukim planti gutpela wok i kamap insait long Papua Niugini tasol dispela

em i no sip bilong Australia, em i sip bilong Papua Niugini stret. Papua Niugini i putim bikipela inv esmen long dispela sip long mipela wok bung wantaim long lukim moa wok i kamap,” em i tok.

PNGIMR tok gutbai long Dairekta, Profesa Peter Siba

Loutova Siapea i raitim

LAS wik Fraide Papua Niugini Institut bilong Medikal Risets (PNGIMR) i bin tok gutbai long wanpela longpela taim wokman bilong institut, em Dairekta, Profesa Peter Siba long wanpela seremoni long Goroka.

Em i bin yangpela man tru taim em i bin greduet long senia haiskul long Pot Mosbi na i flai i go long Goroka, Isten Hailans Provins long kisim wok wantaim PNGIMR olsem wanpela junia saientis.

Ol krismas i kam i go na dispela yangpela man, nau Profesa Siba, i wok long go antap long wok posisen bilong em insait long IMR, i go inap em i kamap nesenel dairekta bilong institut long yia 2010 na i stap inap nau



Fewel Profesa Peter Siba. Deputi Dairekta bilong PNG Institut bilong Medikal Risets, Samson Akunai (long hansut) i givim presen long tok tenkyu i go long dairekta nau i pinis, Profesa Peter Siba.

2016 na em i tingting long lusim wok na malolo.

Insait long wanpela sori taim seremoni we ol wokman bilong IMR i bin holim long oditorium bilong ol long las wik Fraide, Profesa Siba i tokim ol menesmen, wokman na wokmeri na ol pren olsem em i gat bikipela amamas bi-

hain long em i mekim planti wok bilong senisim lukluk bilong institusen.

“Mi amamas long ol wok i kamap na we mipela i winim, na mi gat bilip olsem bihain long 32 yia wok bilong mi wantaim IMR, mi ritaia wantaim gutpela tingting na mi gat strongpela bilip long nupela dairekta bai kisim ples bilong

mi. Mi save olsem em bai kisim wok long wanem hap mi lusim na go het wantaim institusen,” Profesa Siba i tok.

Em i tenkyu long bod, menesmen na ol wokman na wokmeri bilong institusen husat i bin stap sapotim em taim em i wok insait long 32 yia bilong en.



Tenkyu long wok bung bilong yu long helt sevis na helt sekta. Profesa Peter Siba (hankais) i kisim presen long Sif Eksektiv Opisa bilong Isten Hailans Provinsal Atoriti, Joshua Soso long taim bilong tok gutbai seremoni long Goroka las wik Fraide. Poto: Loutova Siapea

Klinim Mosbi kempen kamap gut

Paul Zuvani i raitim

KLINIM Mosbi kempen i kamap gut wantaim gutpela mak na sapot, Ryley Webster, sif eksektiv opisa bilong Sastenebel Kostlains PNG i tok.

Webster i mekim dispela tok taim grup bilong em wantaim ol sapot grup i kamap na tokaut long mak bilong kempen bilong ol long Netsa (Nature) Pak long Mosbi long dispela wik.

Dispela kempen ol i pinis i no longtaim i go pinis.

Em i tok maski ol

kamapim sampela gutpela mak, moa wok i stap bilong mekim Mosbi i klin moa.

“Mi tok amamas long olgeta lain husat i kamap long helpim long kamapim gutpela siti bilong mipela,” Webster i tok.

“Wok bilong lukautim na stap long klinpela ples i stap long han bilong yumi yet.

“Taim yumi tingting gut, mekim ol gutpela samting na tromoi pipia long stretpela ples, bai yumi yet, haus, komyumiti na ples bilong yumi bai stap gut.

“Plantu taim stap bilong komyuniti na ples bilong yumi soim kain tingting mipela i gat long em.”

Em i tok bikipela samting em long senisim tingting bilong yumi yet.

Em i tok manmeri i mas senisim tingting na pasin bilong ol bai stap bilong ples i gutpela.

Linda Nande, wanpela Envauiromen greduet sumatin bilong yunivesiti husat i stap wok wantaim Eko Sevises Ltd we i mekim dispela wok long kodinetim kamap bilong dispela kempen.

Pop blesim Asbisop John Ribat long kamap kardinel



PNG i mas tok nogat long pamuk lo

YUMI PNG i amamas tru olsem yumi sindaun na kirap wantaim tok bilong God na dispela i mekim yumi praud olsem PNG em i wanpela Kristen kantri long wol.

Yumi ken glasim klia olsem sik HIV/AIDS bai i no inap kamap sapos hait na pamuk i nogat. Pasin hait pamuk tasol na sik AIDS i go bikipela na kantri i tromoi bilien kina pinis long dispela sik. Na yumi pipel i kisim bikipela taim long wok developmen long wan wan distrik.

Bikipela samting tru, kalsa bilong yumi i no gat pasin pamuk. Dispela pasin pamuk em bilong narapela kantri na i no bilong yumi PNG.

Yumi lukim sik AIDS i gat bikipela baret i kamap pinis long komyuniti na sapos palamen i pasim o tok oraitim lo bilong pasin pamuk, em bai i gat bikipela asua gen long sindaun bilong yumi insait long komyuniti na PNG. Yumi olgeta i mas save olsem namba 7 lo o komanmen i tok; 'no ken mekim pasin pamuk' long wanem bodi bilong yumi em haus holi bilong God.

Tru yumi glasim buk Genesis 6, Pasin pamuk na pasin nogut bilong ol manmeri ol i kamap birua bilong God na God i pinisim tru dispela jeneresen na lusim Noah na ol famili bilong em tasol, long wanem Noah i stretpela long ai bilong God. Olsem na God Papa i sevim em wantaim famili bilong em.

Olsem tasol PNG yumi bungim kain kain hevi pinis na sapos ol memba i go het na tok oraitim lo bilong pasin pamuk, bai i no inap kamap stret long pasin Kristen na kalsa bilong yumi. Em yumi opim dua bilong Sik AIDS i go bikipela, diskriminesen i go bikipela, sik bilong man kamapim birua long meri bai i go bikipela, sik bilong famili bruk bai go bikipela, sindaun wok na laip bilong ol meri bai i no stret na planti moa asua bai i stap. Olsem na wok bilong yumi Kristen i mas sanap nau na tok "NO" long pasin pamuk.

KARDINEL John Ribat, Asbisop bilong Pot Mosbi, bai kam bek long Pot Mosbi tumora long moning taim na ol bikipela man na meri bilong gavman, sios na midia bai bungim em long Jacksons ples balus, na bai em i bungim ol Katolik bilipman na meri ausait long Jacksons Ples Balus.

Sande 27 Novemba bai i gat bikipela misa bung bilong olgeta Katolik manmeri long Pot Mosbi Asdaiosis long Jack Pidik Pak long 5-Mail.

Dispela em long selebretim dispela bikipela mak we i givim luksave long Papua Niugini insait long Katolik Sios na wol taim Pope i makim Asbisop John Ribat olsem wanpela kardinel. Long wankain taim tu, Asdaiosis bilong Pot Mosbi bai selebretim 50 yia bilong em.

Long las wik Sarere 19 Novemba, Vatican i bin holim seremoni bilong kamapim 17 nupela Kadinal, na namel long ol em Asbisop John Ribat bilong Pot Mosbi.

I bin gat longpela lain long ol pipel i laik go insait long St. Peter's Basilica stat long 8 klok moning taim yet. Sekyuriti sken na sekapi kamap long olgeta lain husat i go insait long St. Peter's Skwea o Basilica.

Mipela ol lain deliget bilong ol nupela Kadinal i bin laki long kisim ol spesel sia insait. Basilica i bin pulap olgeta na seremoni i bin stat long 11 klok moning taim wantaim ol singsing lotu long tokples Latin we Vatican Kwaia i bin singim. Em i



Nupela Kadinal, na pastaim Asbisop bilong Pot Mosbi, John Ribat i putim ol klos na hat bilong Kadinal. Foto: Fr. Victor Rouche.

taim bilong givim ona long ol nupela kadinal i kisim ples bilong ol.

Ol nupela Kardinal i putim ol retpela klos long soim olsem ol i "Prins bilong Sios", bihain long ol i tokaut long "Mi Bilip" na wokim tok promis bilong stap pas wantaim Pop Francis na ol lain husat bai kisim ples bilong em bihain, na bihain ol i go antap na brukim skru long ai bilong em.

Pop i givim wan wan bilong ol wanpela tripela kona retpela hat na i tokim ol olsem kala ret i soim olsem "yu redi long mekim wok wantaim strongpela tingting, maski yu bai lusim blut," long nem bilong Katolik Sios.

Ol i kisim wan wan gol ring bilong bikipela opis ol bai holim na tu wanpela skrol long tokaut olsem ol i makim ol olsem kardinal na i holim "taitel bilong sios" long Rom. Taim ol i givim wok long sios long Rom em i soim olsem ol

nau i kamap memba bilong ol lain pris o klerji bilong daiosis bilong Pot. Bihain wan wan bilong ol i wokabaut i go long ples we 150 narapela kardinal i sanap na i tok welkam long ol na i holim pas long ol olsem ol brata bilong ol.

Insait long homili tok tok o tok stia bilong en, Pope Francis i tok, "Insait long God i no gat ol birua. I gat ol brata na susa long laikim wanpela narapela tasol. God i laikim olgeta pipel. Yumi tasol i save kamapim ol banis, pasim rot na givim kain kain nem long ol pipel."

"Wankain tasol olsem God i laikim pop na lusim rong bilong em, yumi mas laikim ol narapela na lusim rong bilong ol, karim hevi bilong ol, tanim bel bilong sori bilong yumi we i save laik hariap long kotim na sasim narapela, brukim lain na daunim ol.

"Yumi kam long ol longwe ples; yumi gat

kain kain pasin tumuna, skin kala, tokples na kastom; tingting bilong yumi i save narakain long ol narapela na yumi selebretim bilip long kain kain pasin lotu. I no gat bilong ol dispela samting i mekim yumi long kamap birua long narapela; tasol em i wanpela bikipela samting we i dia tumas long yumi," Pop Francis i tok.

Ol 17 nupela kadinal i kam long 14 kantri long wol. Pop Francis em i gat nem long em save laik long putim han i go long ol daiosis we i stap longwe tru long Vatican.

Long dispela taim 16 nupela Kadinal tasol i bin stap long seremoni. Vatican i tok Kardinal Sebastian Koto Khoarai, 87 em i ritaia biso bilong Mohale's Hoek, Lesotho, i kamap Kardinal tasol em i no bin inap long wokabout go long Rom.

Ol 13 nupela kadinal i gat krismas i aninit long 80 olsem na ol bai inap long go long narapela mak gen long go insait long wanpela hait miting long makim nupela Pop we bai go pas long 1. 2 bilien Katolik bilip man na meri long wol. Ol i kolim ol long kardinal ilekta.

Bihain ol Pop Francis na ol nupela Kardinal i kalap long ol liklik kar na i go long lukim ritaia Pop Benedict XVI long Mater Ecclesiae Monasteri, long haus bilong em insait long ol Vatican garden.

Ritaia pop i tok halo long wan wan kardinal, na tok tenkyu long ol i go lukim em, na em i tokim ol olsem, "Mi save beten long yupela olgeta

taim." Bihain long seremoni, Kardinal John Ribat i kam ausait long bungim olgeta PNG deliget insait long St. Peter's skwe long kisim poto.

Namel long ol PNG deliget em ol pater, sista na ol lei bilip man na meri bilong PNG husat i save stap long Rom. I bin gat ol spesel visita olsem: Max Rai, Pemanen Representativ bilong Papua Niugini long Yunaitet Nesens; Winnie Kiap, Hai Komisina long Yunaitet Kingdom, Joshua Kalinoe, PNG Embeseda long Belgium na Vatican.

Namel long ol lain husat i makim sios em: Asbisop Francesco Panfilo bilong Rabaul, Bisop Rochus Tatamai bilong Bereina, Pater Ben Fleming, Vicar Jeneral bilong Asdaiosis bilong Pot Mosbi, Pater Mark McDonald, Supiria Jeneral bilong ol MSCs na tim bilong em, Pater Rozario Menezes, Presiden bilong Federesen bilong Relijes long PNG na Solomon Islands, Pater Victor Roche, Jeneral Seketeri bilong Katolik Bisops Konpresns bilong PNG na Solomon Islands, Mis Zita na Blaise Kuemlangan bilong Manus tasol nau ol i stap long Rom na planti ol sista, brata na pater husat i stap stadi na wok misin long Rom na Itali.

Apinun long 4 klok, i bin gat wanpela kibung bilong ol nupela Kardinal long Paul VI rum insait long Vatican long tok halo na amamas wantaim narapela.

Brukim sios biling i gat histori wantaim sori

Paulus Tali i raitim

WOK Gutnius insait long Luteran Sios long Papua Niugini i bin stat long 1886, we long namba wan taim tru, ol misinari i bin kam sua long Finsafen insait long Yabim seket.

Bihain, sios i go kamap long Tami Ailan long 1889, na bihanim gen long Ogas 1899, we tupela misinari George Bamler na J Decker wantaim ol arapela i bin kirapim stesen long Deinzerhill, na ol arapela ples klostu olsem

Bukawasip, Boac, Bugang, Oligidu, Busong, Tigidu, Butala we ol stap klostu long Misin Stesin insait long Deka seket.

Long 1928, ol i bin kirapim nupela haus lotu long Tamigidu bikiples na insait bilong haus lotu i save kisim namel long 300 - 400, man meri pikinini inap longpela taim nau.

Haus lotu i servim 88, krismas olgeta na long Oktoba 10 dispela yia, ol kristen man meri long Tamigidu i bin rausim olupela haus lotu. Ol lapun,

mammeri i tingim bek hatwok bilong ol tumuna, papa, na ol misinari we ol karim Gutnius i kam aut long em.

Het man bilong Tamigidu Kongrigsen, Jerry Jacob, i tok olsem ol Kristen bilong Tamigidu lukim olsem haus lotu i wok long bruk nau na ol i mas rausim.

Olsem na ol i rausim Tamigidu haus lotu em we i gat histori na nem long en we planti bilong ol sios wok manmeri bilong pastaim olsem ol evangelis, hetman, i bin wok

wantaim ol misineri long i karim aut Gutnius i go long Laukanu long Malolo seket, na long Siassi Ailan wantaim Misinari George Bamler, na tu Gutnius i go long Kaiapit na ol arapela hap tu i kontribuit long wok Gutnius long Tamigidu haus lotu i gat nem na histori long en.

Jerry Jacobi tok ol kristen i gat plen long kisim ol nupela kago na strongplai pos na kapa long bildim gen nupela pamanen haus lotu bai ol i kolim Tamigidu Memoriel historikal sios.



Ol wok i stat long sanapim nupela Luteran Sios haus lotu long Tomigidu, Finsafen long Morobe provins. Foto: Paulus Tali

Strongim helti laip na kamap helti pipel

KAIN KAIN sik i wok long kamap long yumi tude em ol tumbuna i no bin lukim bipo. I gat planti moa manmeri i gat sik suga, moa pipel i sotwin, moa pipel i gat sik long lewa, na planti arapela moa sik i kamap bikos long kain laip ol i stap long en.

Sampela i bisi tumas na i no inap lusim sia na kirap wokabout raun long opis, sampela i ran tasol long kar, sampela i kaikai gris na swit kaikai na dring sofdring tasol. Ol kain kaikai olsem i no gutpela tumas long bodi bilong man.

I gat planti moa fatpela manmeri long ol taun na siti tude bikos ol i gat mani long baim ol kain kaikai bilong stua na i lus tingting long ol gutpela gaden kaikai bilong yumi.

Tude yumi stat long luksave nau olsem kaikai inap long kilim man.

Dispela sik daiabetis o sik suga em i wanpela bilong ol sik i wok long kamap bikpela tru long PNG. Long taun na siti we ol pipel i no save wok gaden o eksasais o mekim ol bikpela wok we bodi i ken tuhat na blut i ran gut, yumi lukim moa pipel i wok long kisim dispela sik.

Bikpela luksave i stap long strongpela disaplin bilong bodi. Sapos yumi bosim gut laip na skelim wanem kain kaikai yumi putim long bodi, ating bai yumi no inap bagarapim bodi na opim rot bilong ol dispela nupela kain



Jada 016!

...So yu skelim, husat em helti man?

sik i kam insait.

Samting olsem 30 yia i go pinis Helt Dipatmen i save bringim ol toktok bilong gutpela nutrisen na skulim ol papamama long givim rait kaikai bilong gaden long ol pikinini.

Long dispela taim, ol pipel i no

gat mani long tromoi long ol gris na swit kaikai bilong stua. Tasol tude, laip i senis na i nomal long lukim ol stua i kamap olsem gaden bilong yumi bikos yumi les long wokabout i go long maket, o yumi stap long ples we maket i longwe tumas o i no seif long ol

mama i ken go baim kaikai.

Sindaun bilong yumi tude i gat kain kain salens. Long ol taun na siti, i gat hevi bilong mani. Kost bilong ol samting i dia tumas. Mani i bosim laip bilong ol famili na papa wantaim mama i bisi long painim mani na planti taim ol i no

was gut long helt bilong famili. Ol i no gat taim bilong raun na mal-olo gut na kisim win wantaim famili na ol pren.

Ol i stap tasol long haus we ol i slip, kirap na go wok na kam bek gen na mekim wankain samting olgeta de long laip bilong ol. Ol pikinini husat i gro long kain laip olsem bai i bihainim stail ilong papamama bikos ol i ting em i nomal.

I gat ol dokta na nes na ol save lain bilong helt husat i luksave pinis long ol dispela laipstail sik na planti bilong ol i toktok strong long pipel i mas senisim pasin bilong ol. Kaikai gutpela helti gaden kaikai na ol abus i no gat planti gris na oil tumas.

Eksasais o pilai spot na maski ran long kar oltaim. Sampela taim i gutpela long lusim kar na wokabout. No ken baim sofdring, dringim wara o kulau.

Yumi lukautim gut bodi bai bodi i stap strong na lukautim laip bilong yumi. I no gat narapela rot. Yumi yet i bosim tingting na bihainim stretpela pasin bilong stap gut na yumi ken amamas na stap longpela taim.

Tude yumi lukim planti manmeri i no winim 50 krismas yet i wok long pundaun long sik o ol i dai hariap bikos long ol dispela laip stail sik i wok long kamap bikpela nau long kantri bilong yumi.

Mak ogenaísesen save lukluk long kisim wok manmeri

LONG ogenaísesen i kamap na stap gut ol bosmanmeri bilong ogenaísesen i laikim gutpela wok manmeri.

Long dispela as bipo long ol bosmanmeri i kisim man na meri long wok, ol bai laik save long ol mak we i soim gutpela bilong ol man na meri we bai wok gut na strongim stap bilong ogenaísesen.

Hia nau sampela ol mak we Forbes bisnis grup bilong Amerika i tokaut long ol bosmanmeri i save lukluk taim ol i kisim ol wok manmeri:

- Eksen – manmeri husat i no save kisim taim long wok na sapos i gat sans long wok ol bai wok. Ol i yusim sans na dispela i strongim tingting bilong ol long wok moa yet. Ol bos manmeri i tok dispela ol manmeri i save mekim mani;

- Save – dispela i no wanpela samting tasol we i save strongim ogenaísesen, tasol i as we sapos ogenaísesen i laik kamap gut dispela i mas i stap;



- Laik bilong mekim samting – ol wok manmeri i ken sapotim kampani sapos ol i gat laik long kamapim gutpela wok. Laik em samting i save mekim wok manmeri i mekim wok na strongim kampani;

- Indipenden – i gat strong na save long mekim wok na i no oltaim wetim bos manmeri long tokim em long mekim wok. Dispela wok manmeri i gat save long mekim wok na i no save askim planti askim long ol rot bilong mekim wok;

- Soim em i lida manmeri – bosmanmeri i laik save sapos wanpela i ken gat bilip long mekim ol samting na wanpela we i ken go pas

long ol wok manmeri long mekim wok;

- Inap long wok wantaim ol arapela – bos manmeri i laik save sapos em inap long wok gut wantaim ol arapela na ol arapela inap long wok gut wantaim em. Ol arapela wok manmeri i no ken painim hat long wok wantaim em;

- I gat strong long wok – ol wok manmeri husat olgeta de i save luk smat na strong long mekim wok. Ol wok manmeri husat i no amamas long wok na i save lusim strong hariap long wok bai i no inap long strongim ogenaísesen;

- Gat bilip long ol yet – ol wok manmeri husat i save long wok ol i mekim na i gat bilip ol yet, dispela ol wok manmeri bai strongim ogenaísesen;

- Gat gutpela mak – ol bos manmeri bai lukluk long wok histori bilong man. Ol i laik save sapos manmeri i stap longpela taim wantaim

pastaim ol kampani na sapos em i bin kamapim ol gutpela wok;

- Tok tru – wok manmeri i ken gat save long mekim olgeta samting tasol em i no soim trupela pasin, em bai i no inap long strongim ogenaísesen;

- Wok hat – bikpela ol samting i no save kamap isi. No gat bikpla ol samting i kamap wantaim planti ol wok manmeri. No gat. Ol bikpela samting long ogenaísesen i kamap bihainim hat wok bilong ol wok manmeri.

- Makim gut kampani – sapos ol i go aut em i isi long tokaut long opis o ogenaísesen ol i kam long em.

Ogenaísesen i ken trenim wok manmeri long wok em i laik kamapim long em tasol sapos em i no trenim em long gutpela pasin, long stap wok namel long ol salens, i gat bilip long em yet na gat gutpela wok etik, ogenaísesen bilong em i no inap long kamap gut.



Published Weekly, Thursday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: (675) 325 2500

Fax: (675) 325 2579

Email: editorial@wantokniuspepa.com

Pe bilong wanpela yia
52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager

Elizabeth Konga

Editor

Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Toro



Biabia



Kanage



Bikpela Madang Musik Festival bai kamap neks mun

James G. Kila i raitim

OL BIKNEM music man bilong Madang wantaim ol musik atis bilong arapela provins long PNG bai soim stail bilong ol long promotim musik long namba wan Madang Musik Festival.

Dispela festival bai kamap long Madang long Desemba 11 i go inap 18.

Dispela nupela kain Festival bilong musik bai ran long wanpela wik na bai lukim tu kambek bilong stringben na mambu ben resis na tu kwaia na gospel ben resis.

Minista bilong Petroleum na Eneji na Memba bilong Madang, Nixon Duban i

kamapim dispela tingting long helpim ol yangpela manmeri long Madang long

daunim hevi bilong lo na oda long distrik na provins.

Minista Duban yet i sapotim dispela Festival olsem namba wan sponsa. Bikpela het tok bilong Fes-

tival em 'Bungim Olgeta Pipel Wantaim Musik'. Long tok Inglis het tok em 'Unifying People Through Music'

Tumbuna Musik TV Kampani long Madang i go pas long rejestresen na ogenaism dispela bikpela Festival.

Ol posta i kamaut pinis na bikpela sain i stap pinis long rot i go insait long Madang taun long Modilon Rot promotim dispela namba wan kain musik Festival.

Long wan wik Festival bai lukim stringben resis, mambu ben resis na kwaia singsing resis na tu ol lain bilong singsing bai skelim nek bilong ol long vokal resis.

Planti lain i baim rejestresen long soim musik stail bilong ol. Ol rejestresen fi em K100 long stringben na mambu ben. Fi bilong ol lokal laip ben wantaim gospel laip ben em K200. Fi bilong vokal o lain bai singsing nating em K100, na open kwaia lain em K50. Ol skul kwaia lain bai no gat fi.

Tok save long posta bilong Madang Musik Festival i tok olsem ol wina bilong ol stringben, mambu ben na ol arapela bai gat fes, seken, na namba tri ples long kisim kes prais. Moa long en tu ol lain i kamap namba wan long laip ben na gospel laip ben bai gat sans long rekot na wokim vidio klip. Husat i kamap namba wan long vokal o singsing tu bai gat sans long rekot na wokim vidio klip.

Wantok Niuspepa i bin bungim biknem musikman bilong PNG na Madang, Demas Saul long las wiken, na Demas i stori olsem em wantaim narapela bikpela nem atis na 'bikpela pukpuk' bilong Angoram, Felix Yausi i wok long mekim save long redim ol yet pairap long neks mun.

Planti ol olupela lain o lapun bilong Madang i amamas olsem stringben resis i kambek na ol i sapotim tru dispela tingting long kamapim dispela wan wik musik Festival.



Teks i kam long 71845906

Dia Edita, mi gat wanpela tingting na mi laik autim long yupela Wantok Nius. Ol skul bilong yumi long Pot Mosbi, long praimer skul, mi no save ol i save operet olsem wanem. Sampela ol tisa i no save kam long skul na I no save givim home wok o asainen long ol pikinin. Mipela ol papa mama na gadien bilong ol pikinin mipela i save salim ol kam long skul bilong kisim save, na sapos yupela ol tisa i no save mekim wok olsem tism ol sumatin bilong yupela, ol pikinin bilong mipela. Yupela i westim taim bilong gavman long baim yupela bilong wanem yupela i fulfilim dispela driman bilong mipela ol papa mama na gadien long skulim gut ol pikinin bilong mipela. Sapos mipela i mekim atem long bringim ol i go i kam long skul, yupela tu i mas mekim gutpela wok bilong yupela. I moa beta sapos ol skul inspekta i go raun na lukim ol skul long Mosbi siti. Tenkyu.

Konsen gadien

Dia Edita yumi save harim Hanuabada viles em i stap klostu tru long Konedobu ol gavman hetkota o gavman haus stap long en na ol i save tok em i bikpela ples. Yes em i bikpela viles tasol i no luk olsem stap klostu o bikpela siti yu draiv go olsem na lukim em gutpela viles bilong ol tasol rabis na kain kain pipia plastik botol na rot tu nogut stret. Na sampela taim ol turis o ol sampela bik manmeri bilong narapela kantri i kam raun lukim ples taim bai olsem wanem ol bik manmeri yu bai kisim sem ya na mekim samting em ples na viles bilong yu yet mi tok tasol olsem.

Wapu Mk Mosbi, PNG


Dia Edita bilong Wantok Niuspepa, mi laik autim bel hevi bilong mi na mi ting planti man bai i wanbel long en. Bel hevi bilong mi i olsem, long Gerehu Raunabaut i go long Yumi Yet Real Estate na rot i go Tete bek rot em kisim wan ful yia na 6-pela mun olgeta olsem nupela rot nogat, em sotpela olupela rot tasol ya ol isi isi na westim taim na mani stap. Inap ol lain i go pas ken sekim dispela kampani PHOENIX o? Tenkyu.

J.Aina Stg 7



Tupela biknem musik atis bilong Madang, Vok Kiatig bilong Shydeez ben na Demas Saul i sanap wantaim biknem musik man bilong Solomon ailan, Sharzy long wanpela konset long Madang. Foto: James G. Kila

Em nau! Ol pikinini i ken painim rot i go long ples wantaim Wantok lain...



Muruk na kakaruk tupela i birua

Bipo taim tupela enimal i mekim pren gut long tupela yet na i stap long ples. Ol i stap na wanpela taim Muruk i tokim pren bilong em kakaruk long tupela i mas go long bus na katim diwai bilong mekim kanu.

Long nait tupela i toktok na Kakaruk i yes long Muruk. Tulait long moningtaim nau na taim bilong go long bus na Kakaruk i les gen long i go. Muruk wan i go long bus na katim diwai long mekim kanu. I go apinun na em i kam bek long ples na long nait em i askim Kakaruk long i go na tupela pulim diwai i kam long ples na sapim kanu. Long nait kakaruk i tok yes na tulait em i les gen olsem pastaim, na muruk wan yet i go pulim diwai i kam long ples. Em i sapim pinis na i kamap kanu nau na em i sakim pren bilong em kakaruk gen long go long kisim ol liklik diwai bilong saman. Em tu kakaruk i les. Orait, em wanpela i go kisim diwai na sel bilong kanu i kam long ples na pasim long kanu.

Kanu i redi nau na muruk i pulim i go daun long solwara. Nau tupela i kalap i go antap long em. Muruk i sin-



daun bihain long stia na kakaruk i sindaun long fran. Tupela i sel i go long Karkar Ailan, na namel nau win i kam bloim kangal long as bilong em na ol i singsing na muruk i lukim em i no gat. So em i askim pren kakaruk bilong em na pren i givim wanpela long em.

Muruk i kisim na i laik planim, tasol em i abrus na subim i go olgeta long hul pekpek bilong em. Em i tanim lukluk na kangal i no sanap, na em i askim pren bilong em kakaruk gen long wanpela. Kakaruk i tok: O sori mi givim pinis long yu. Na muruk i tok sori mi planim tasol i no sanap olsem bilong yu.

Em nau muruk i stat long kros nau. Em i tokim kakaruk: Yu les paul yu. Yu no helpim mi long wokim dispela kanu. Yu raun skrapim pekpek arere long ples i stap na mi wan i wokim. Bai mi brukim as bilong kanu nau. Na kakaruk i tok: Pren em i samt-ing bilong yu. Sapos yu laik brukim em i orait tasol.

Dispela i mekim muruk i belhat tru, na nau em i kirapim lek bilong em i go antap i kam daun na brukim as bilong kanu na wara i kamap na pulap long kanu na kanu i go daun long

solwara. Tarangu muruk i no inap flai na swim long solwara. Na kakaruk i kirap flai i go pinis long Karkar.

Muruk i swim i stap na wanpela trausel i kam na em i askim em long kisim em. Na trausel i tokim em i go antap long baksait bilong em. Em i karim em na spit nogut i go. Na muruk i pret na pekpekim baksait bilong trausel.

Pekpek bilong em i sut nabaut i kam daun olsem tauka i sutim spet bilong em. Trausel em i karim em isi i go long Karkar, bringim em antap stret long wesana. Na muruk i kalap i go daun na i tanim trausel na pasim lek han bilong em.

Wantu em i ran i go antap long ples tokim ol man i kam na karim i go antap long ples. Ol i putim trausel i stap na ol i go long gaden na wanpela rat i kam na katim rop bilong em na em i ranawe i go bek gen long solwara.

Em long dispela taim na nau tupela ya muruk wantaim kakaruk i birua long kanu na wanpela i ranawe i go stap long bus na wanpela i stap long ples. Em tasol.

Ruth Aresop, Josephstal/Madang

PAINIM WOD PILAI

Ol wod lista:

	DAUNBILO	KOPRA	WATAIM
	KELA	PASIN	YUROP
HOLAN	HATWOK	RUKSAK	MASKET
AILAN	LUKSAVE	TAIM	KRAUN
GARAMUT	GITIM	SAUA	NAISPELA
BAMBAI	MISMIS	PEMAN	MUSMUS
HAPKAS	OLDE	SWINGE	LAIKIM

O S A N G O C T I O V E G U O A M M O C V U R A U
M R E K R A R K S N I R R N C I E F G J C N C G L
L M R R V Z Q R C A S J Y Z H N E X Z T R U E I M
F O J O Y B T D I K F R E G O H E I D B N F E O F
E S U P S R R U F D O I N K L O N C I P Z O N O N
H E N V I W A S L E I P E X A W A N S I L J G A R
R L F G S D T H A H A F R M N U U E M F L L Q P C
D C G E A T S B S H K E L A A A R A A C I R S O K
I Q T I O F B F R H Q R M S R P A R I I S E K A M
I F E S I L F M E G I E P K W I A J L T P O S I H
V C I F I O S D B O P G U E T I P U A F W K K S H
A N D E T A E C O K E G I T I M N J N T U I I R Y
K N R J S O D B D T O P E S P E P G A R A M U T C
U O W G L P A L R E E W H K T I N H E L S I E L V
F I M M Y D V X O O A A A A M H E H E I F V M M G
C N E C X R D Y R O E N C T G U A P M L A O E R A
S S H X S N E U O D I E R I A H S P S S R S O S Y
E I F E E R L R L S B A M B A I V M K T R S A Z E
L U S L T R S O A H E O U E A Z M U U A D D S O R
F T A S F I V P E D D A U N B I L O E S S D F O O

Ansa bilong Wod Pilai isu 2201





TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

PNG na Solomon i seif long Nu Silan

Caroline Tiriman i raitim

OL pipelbilong Papua Niugini na Solomon Ailan long Nu Silan i stap orait na no gat wanpela i kisim bagarap bihain long bikpela guria em i bin kamap long bik moning long Mande.

Hai Komisina bilong PNG, Brigadia Jeneral Francis Agwi na Solomon Ailan Hai Komisina Joy Kere i tokaut long dispela.

Strong bilong dispela guria i bin kamap olsem 7.8 na i bin kamap long not-is bilong Christchurch.

Tupela pipel i bin dai na ol i wok long pilim yet planti moa graun guria.

Dispela guria i bin barara-pim planti samting tasol tupela diplomat i tok ol pipel bilong PNG na Solomon Ailan huat i stap long Nu Silan i seif.

PNG Forest Industries i no wanbel long takis

Caroline Tiriman i raitim

FOREST Industries Association (FIA) bilong Papua Niugini i tok em i no wanbel long tingting bilong gavman long apim takis long ol diwai o log em ol i save salim igo long ol narapela kantri.

Dispela tingting bilong gavman i bin stap insait long Nesenel Baset em ol i bin tokaut long en long stat bilong dispela mun.

Eksektiv opisa bilong Forest Industries Association Bob Tate i tok mak bilong takis em gavman i bin putim long ol raun log em 28.5% i bikpela tumas.

Tresera Patrick Pruaitch i bin tokaut tu olsem as tingting bilong apim takis long ol diwai em ol i save salim i go long ol narapela kantri em bilong mekim ol kampani i mekim ol daunstrim prosesing wok bilong helpim ikononi bilong kantri.

Mista Tate i tok sapos gavman i go het long dispela takis em bai mekim planti loging bisnis i dai, na tu samting olsem 15 tausen pipel bai lusim wok bilong ol.

Tasol Gavana bilong Oro Provins, Gary Juffa itok, maski sapos ol wokman bilong loging kampani i lusim ol wok bilong ol, ol i ken go bek long ples na yusim graun bilong ol long lukautim sindaun bilong ol.

Kenn Mondiai, husat i bin wok bipo olsem forestri opisa na nau em i go pas long NGO grup Partners With Melanesian i tok planti yia pinis ol timba kampani i bin wok long bagarapim olgeta samting long bikbus bilong PNG.



INTENEL REVENIU KOMISEN

Pablik Toksave



TOKSAVE I GO LONG OLGETA LAIN I BAIM TAKIS LONG SALIM OL TAKIS RIPOT PEPA I KAM BEK

Intenel Revenu Komisen i gat bikpela wari long planti lain i bilong baim takis i no save bihainim lo bilong pulimapim ol pepa bilong takis ripot aninit long Papua Niugini Takis Lo. Olsem na mipela i laik toksave long olgeta lain husat i save baim takis long wok bilong ol aninit long lo, long salim ol takis ripot pepa bilong ol i kam long ol de we i stap antap long ol dispela pepa na long wanem hevi bai ol i kisim sapos ol i no salim i kam long taim stret.

Long yu bai kisim save moa ol de we nau i stap long IRC em olsem i stap long tebol daunbilo. Sampela taim ol de bai senis liklik sapos ol lain bilong baim takis i rejista wantaim wanpela ejen bilong kisim takis.

Nem bilong Takis Pepa	De bilong kam insait	Wanem Kain Ripot
Bisnis Inkam Pemen Takis	Namba 1 de bilong mun	Ripot bilong Mun
Kopret Inkam Takis	28 bilong Februeri bilong yia bihain	Ripot bilong yia
Pesonal Inkam Takis	28 bilong Februeri bilong yia bihain	Ripot bilong yia
Guds na Sevis Takis	21 de bilong mun bihain	Ripot bilong mun
Salari na Pe Takis	Namba 7 de bilong mun bihain	Ripot bilong mun
Stetmen bilong Mani ol i kisim	Namba 14 de bilong Februeri bilong yia bihain	Ripot bilong Yia

Enuel Rimitens Stetmen bilong holim bek takis tu i mas kam wantaim ol ripot bilong takis bilong yu. Ol opisa nau i wok long toktok long ol lain bilong baim takis bihainim ol ripot we i soim olsem ol i no bin salim ol ripot bilong takis i kam yet. Plis bekim toktok hariap long ol Opisa na salim ol takis ripot bilong bipo we yupela i no bin salim i kam yet na bai yupela i abrusim mekim save bilong dispela pasin bilong brukim lo.

Bai yu salim takis ripot bilong yu olsem wanem?

Yu ken wokim olpela takis ripot bilong yu long dispela kain we:

- Yu yet go long Intenel Revenu Komisen opis long hap yu stap long en (Taim: Hap pas 8 klok moning taim i go long 3 klok apinun. Mande i go Fraide, pablik holidai bai no gat)
- Salim ol takis ripot bilong yu long email: lodgements@irc.gov.pg
- Salim long Post Opis adres: P.O. Box 777, Port Moresby, NCS, Papua New Guinea

Plis yupela i mas lukim gut ol pepa yupela i pulimapim em i mas stret long (yia/taim) we yupela ken kisim long websait bilong Intenel Revenu Komisen long (http://www.irc.gov.pg/tax_forms.html) na wanem moa pepa bilong salim bek olsem (e.g. ol fainensel stetmen) lodged mas kam wantaim ol takis ripot pepa bilong ol.

Wanem kain wei bilong baim takis?

Yu ken mekim ol peimen long ilektronik fans transfe, sek o kes mani. Mipela i laikim yu long salim ol pepa bilong yu na baim takis bilong yu long ilektronik fan transfe bikos em isi, i save hariap na em i seif. Moa toktok long dispela long wei bilong yusim ilektronik fans transfe i stap long Intenel Revenu Komisen websait (http://www.irc.gov.pg/publications_guides.html) ("Electronic Payments - Taxpayer Guide"). Yu ken raitim ol sek i go long nem bilong "Commissioner General Internal Revenue" na putim mak "Not Negotiable".

Bai mi mekim wanem?

Taim wanpela Opisa bilong Intenel Revenu Komisen i toktok wantaim yu, mipela askim yu long salim olgeta olpela takis mani insait long 7-pela de tasol. Sapos yu save pinis long ol takis ripot we yu no bin baim, mipela askim yu long salim ol dispela wantiam ol narapela takis we yu no baim i kam hariap long mipela.

Long dispela taim tu mipela i laik toksave gen long ol enteprais olsem ol takis ripot aninit long lo bilong Papua Niugini i mas kam stat yet long de ol i rejista, maski sapos ol i stat long kisim ol wokman pinis o i no yet.

Wanem samting bai kamap sapos yu no salim ol ripot bilong takis i kam long taim stret:

Bai yu kisim mekim save aninit long Papua Niugini takis lo sapos yu no salim ripot hariap na sapos yu no baim takis bilong yu hariap. Yu mas harim toktok bilong Opisa husat i toktok wantaim yu na wanem kain toksave we Intenel Revenu Komisen i givim na yu na yu no ken wet na bai yu no inap kisim bikpela mekim save na ol Opisa bai i no inap long givim yu difolt asesmen na statim kot eksen long wankain taim yet.

Sapos yu no inap long salim ol takis ripot bilong yu o yu no baim takis bilong yu o sapos yu no ting olsem yu bin salim ol takis ripot bilong yu, plis yu mas toktok wantaim Intenel Revenu Komisen nau tasol na yu no ken wet. Yu ken kisim mipela long:

- email i go long enforcement@irc.gov.pg
- Ring long telepon namba +675 322 6600 na askim long long salim i go long Early Collections Unit
- Salim pas i go long Ruth Banang, Early Collections Unit, Revenue Haus, P.O. Box 777, Port Moresby, NCD, Papua New Guinea.

Tok orait i kam long

Betty Palaso, OBE Komisina Jeneral, Intenel Revenu Komisen



Bisnis bilong katim diwai i bagarapim graun long Inaina Wailaip Manesmen Eria long Kairiku Hiri Distrk long Sentral Provins.

Ol 5 milien pipel no gat dokta long distrik

Caroline Tiriman i raitim

SAMTING olsem 5 mien pipel long planti long ol 89 distrik long Papua Niugini i no gat dokta i stap long en na gavman i mas lukim dispela olsem wanpela praioriti bilong en.

Dispela em i toktok bilong Dokta David Mills, emi Presiden bilong PNG Society of Rural and Remote Health - na tu em i Medikol Suprintenden long Kompam Rural Hospital long Enga Provins.

Em i tokaut long dispela taim planti lida na pipel long PNG i tok gavman imas strongim kensa helt sevis na maski long lusim planti milien kina long lukautim ol kain bikpela iven olsem dispela Under 20 Women's World Cup emi kamap nau long Pot Mosbi na tu APEC miting long 2018.

Ol i mekim dispela tok-tok ken bihain long wan-

pela meri husat i bin dai long kensa bilong seviks i bin raitim wanpela pas we emi bin askim strong gavman long baim wanpela gutpela masin bilong tritim ol kensa sikman-meri na pikinini long kantri.

Long dispela taim i gat wanpela kensa masin tasol istap long Angau Memorial Hospital long Lae, tasol planti taim dispela masin i no save wok.

Ol dokta itok, PNG igat ol kain kain kensa olsem, sevikal kensa, maus kensa, throat kensa na lang kensa, na planti pipel husat i save gat dispela ol kain sik i save dai long wanem kantri i no gat gutpela kensa sevis.

Dr Mills i tok ol rural helt woka long kantri i save wari olsem gavman i no lukim rural helt we moa long 80% long ol pipel i stap long en olsem wanpela praioriti.

Boko Haram kamapim hevi yet long Nigeria



Vais presiden, Yemi Osinbajo, i toktok wantaim wanpela bilong ol Chibok skul meri long Abuja.

BOKO Haram i wok long pait yet wantaim ol soldia bilong Nigeria na ol ripot i tok dispela Islam grup i wok long hait yet na kamapim trabel long dispela kantri. Ol ripot i bin tok olsem gavman bilong Nigeria i rausim Boko Haram tasol i luk olsem ol i wok long kamapim trabel yet. Boko Haram i wok long kamapim trabel long Nigeria inap 7-pela yia nau.

Ol dispela lain i bin larim 21 meri studen i go fri long tupela mun i go pinis bihain long ol i bin holim na kalabusim ol dispela skul meri long wanpela skul long Chibok moa long tupela yia i go pinis.

Long taim Muhammadu Buhari i kamap presiden 18 mun i go pinis, em i bin promis long pinisim Boko Haram na em i wok long tok ami bilong Nigeria i rausim ol pinis.

Long mun Ogas, taim US Seketeri bilong Stet, John

Kerry, i bin go long Nigeria, em i bin tok amamas long Nigeria. Brigadia Jeneral Mansur Dan-Ali, Difens Minista, i tokim ol niuslain las wik olsem gavman i rausim pinis moa long 95 pesen bilong ol sekyuriti salens long Nigeria long wanpela yia.

Tasol nau ol Boko Haram i wok long pait egensim ol soldia bilong Nigeria na moa pipel i bilip ol dispela lain teroris i no lusim Nigeria yet.

Long Ogas, Boko Haram i bin kamapim 12-pela birua egensim ol soldia bilong Nigeria, long Septemba 24 na long Oktoba 22.

Long not-is Borno, ol i bin tekova long wanpela militeri kemp na givim bagarap long 13 soldia na kalabusim 83 arapela soldia.

Las wik ol i kilim tupela soldia long rot long taim ol i pairapim bom na ol i kilim wanpela opisa husat i wok long lukautim wanpela mili-

teri kemp long Malam Fatori. Dispela opisa, Muhammad Abu Ali i gat 36 krismas na tripela pikinini. Em i wanpela biknem soldia gavman i bin givim namba long em long luksave long ol wok bilong em. Ol lain Boko Haram i bin kilim Ali wantaim 6-pela soldia. Tasol ol soldia i bin strong na kilim 14 Boko Haram.

Nau em i taim bilong san na ples i drai olsem na ol Boko Haram i painim isi long raun long bus na pait wantaim ol soldia. Tasol ami bilong Nigeria i gat bikpela hevi nau – ol i sot long ol gan na ol samting bilong pait.

Hevi bilong korapsen tu i stopim wok bilong baim ol samting bilong pait. Namel long Septemba na Novemba, planti soldia bilong Nigeria i bin dai long han bilong ol Boko Haram olsem na ol i bilip dispela teroris grup i stap yet.

promis bilong em long stretim Minsk bel isi agrimen bilong stopim trabel long Isten Ukraine. Obama i askim Putin long strongim dispela agrimen na luksave long Ukraine olsem wanpela kantri.

Rasia wantaim USA i no gat gutpela luksave namel long ol yet bihain long ol woa long Syria na long ol hevi long Ukraine. Obama i wok long raun nau long las bung bilong em olsem presiden bilong USA, bipo long em i givim dispela wok i go long Donald Trump long 20 Janueri 2017.

Barack Obama wantaim Presiden Vladimir Putin, long Asian Pacific Economic Cooperation miting long Lima, Peru las wik.

Tren i kapsait na 120 pipel i dai



Ol opisa i sekap long wanpela bilong ol 14 karis i bin kapsait long dispela tren.

SAMTING olsem 120 pipel i dai na moa long 200 i kisim bagarap bihain long wanpela tren i kapsait long Kanpur siti long noten India. Ripot i tok dispela i wanpela bikpela birua tru i kamap long wanpela tren. Planti handet moa pipel i bin pas insait long ol 14 karis bilong tren.

Dispela tren i bin lusim Indore na ran i go long Patna long Sande nait long taim dispela birua i kamap. Ol ripot i tok long taim tren i kamap klostu long ples Purwa, ol 14 karis i lusim rot na kapsait. Dispela birua i bin kamap long samting olsem 3 klok moning long taim planti pasindia i bin slip. Planti bilong ol dispela lain i dai i bin stap long tupela karis klostu long ensin bilong tren.

Polis inspekta Zaki Ahmad bilong Kanpur i tokim Agence France-Presse nius ejensi olsem 120 pipel i dai na samting olsem 200 i kisim bagarap.

Ruby Gupta husat i laik go long go long Azamgarh siti long marit i wok long painim papa bilong em.

“Mi no inap painim papa bilong mi. Sampela pipel i tokim mi long sekap long

haus sik na long mog,” em i tok. Olgeta bilas na kago em i karim long go marit i lus long dispela birua, tasol Gupta i wari tru long painim papa bilong em.

Klostu long em, wanpela boi i wet long lukim sapos ol lain bai painim papa bilong em tu.

“Mipela i pilim tren i bin guria. Ol brata na susa bilong mi i stap laip. Mi painim olgeta tasol mi no inap painim papa,” em i tok.

Wanpela lapun pasindia i tok, “Long 3 klok, tren i stat long guria. Na bihain mi no save moa. Karis i kapsait. Mipela i bin stap long karis namba faiv. Mipela i no inap opim dua, tasol laki mipela i bin kam autsait,” em i tok.

Ol lain i wok long traim painim ol kago na ol pasindia. Ol i tokaut long nem bilong 67 pipel husat i dai. Ol helt woka i helpim ol 200 arapela husat i kisim bagarap na karim ol i go long haus sik. Dispela ples i bin stap longwe olsem na ol ebulens i no bin kamap hariap.

Ol medikol tren long Jhansi siti i karim ol marasin na imejensi ikwipmen bilong helpim ol pipel na ol i kisim ol winis i go long dispela eria long apim ol karis i bin

kapsait. Ol Nesenel Disaster Respons Fos na ami i bin yusim ol ges kata long painim ol pipel long Sande moning.

Pratap Rai, wanpela senia relwe opisa i tok, “Mipela i traim long sevim laip bilong ol pipel, tasol em i no isi long katim ol karis.”

Praim Minista bilong India, Narendra Modi, i tok em i wari tru long dispela birua na em i tok gavman bai givim kompensesen mani long famili bilong ol lain i dai.

Olgeta de moa long 20 milien pipel long India i save yusim dispela lapun relwe sistem bilong kantri. I no gat gutpela mentenens na planti hevi i save kamap.

Planti eksiden i save kamap long ol tren long India na olgeta yia moa long 25,000 pipel i save dai. Minisitri bilong Relwe i tok sefti rekot i no gutpela tumas namel long Epril na Novemba na planti tren i save lusim rot na kapsait.

Wanpela ripot i tok ol dispela birua i kamap bikos i no gat gutpela mentenens na ol lain i no save was gut na stretim hariap ol bagarap i kamap long taim bilong tait o taim graun i bruk i kam daun long rot bilong ol tren.

Obama toktok wantaim Putin

PRESIDEN Barack Obama bilong USA i bung sotpela taim wantaim Presiden Vladimir Putin bilong Rasia las wik long taim bilong APEC miting na em i tokim Putin long traim painim rot bilong stopim pait long Syria. I gat bikpela wari nau bikos Rasia i wok long helpim Syria long dropim ol bom long Aleppo. Ol dispela bom i kamapim bikpela hevi tru na kilim planti manmeri na ol pikinini.

Obama i bung namba wan taim wantaim Putin bihain long las wik ileksen bilong nupela presiden bilong Amerika, Donald Trump. Dispela bung em i las miting bilong tupela wol lida.

Long Syria, Obama i laik Seketeri John Kerry wantaim Foren Minista bilong Rasia,

Sergei Lavrov, i wok wantaim ol arapela wol lida long stopim dispela woa.

Gavman bilong Syria i stat long kamapim strongpela pait long tekova long ol hap bilong Aleppo em ol rebel soldia i holim.

Rasia i bin go insait long woa long Syria las yia bihain long gavman bilong Presiden Bashar al-Assad i askim ol. Rasia i tok ol i no tromoi bom long Aleppo tasol long ol arapela provins i stap klostu.

Samting olsem 250,000 pipel i stap long Isten Aleppo, em i namba tu bikpela siti bilong Syria bipo long woa i bin kamap long Mas 2011.

Long dispela 4 minit bung wantaim Putin, Obama i tokim Rasia long tingim



Global tred, bisnis na invesmen toktok long APEC

OL lida bilong 21 APEC memba kantri i bin bung long Lima, Peru long las wiken na toktok long sampela ol bikpela samting long bisnis na ikonomi.

Praim Minista Peter O'Neill i tok ol lida bilong APEC wantaim ol global bisnis lida i bin toktok long ol bikpela samting olsem hevi bilong global ikonomi, tred na invesmen i pundaun.

"Long CEO Samit, mi bin toktok long rot bilong kamapim sastenebel developmen. Bilong PNG, yumi ken kamapim sastenebel developmen taim yumi strongim ikonomi wantaim bisnis, na givim edukesen na

helt ke sevis long ol pipel.

"Planti ol APEC lida i bin laik save long ol ekspirens bilong PNG taim gavman i bin ranim kantri long taim bilong hevi bilong global ikonomi.

"Mipela tu i bin makim PNG na kisim sampela ekspirens bilong ol lida bilong arapela APEC memba kantri we ol tu i bin bungim wankain salens.

"Long APEC Bisnis Edvaiseri Kaunsil, mi bin autim ol wei we yumi ken bihainim long kirapim ol liklik bisnis o SME, promotim helt na gutpela sindaun bilong ol wok manmeri, na kirapim maining sekta wantaim daun-

strim prosising.

"Ol lida i bin pinisim APEC wok agenda, we dispela agenda i karamapim fud sekyuriti, klaimet senis, na fri tred na invesmen.

"Kantri bilong yumi em i wanpela liklik APEC ikonomi, na wanpela Pasifik Ailan kantri tasol insait long APEC.

"Gavman i laik yusim dispela sans long APEC na bringim moa developmen i kam insait long larim ol manmeri na ol bisnis i kisim ol gutpela samting."

"Dispela APEC Samit bai helpim yumi long kisim ekspirens taim PNG i mekim ol wok long redim kantri long holim bikpela APEC Samit long

via 2018," Mista O'Neill i tok.

Sampela ol bikpela bisnis lida olsem Menesing Dairekta bilong International Monetary Fund (IMF), Christine Lagarde, na arapela ol biknem bisnisman

olsem Sif Ekesekektiv Opisa bilong Facebook, Mark Zuckerberg, i bin go toktok long dispela bung.

Ol biknem wol lida olsem Presiden bilong Amerika, Barack Obama, Presiden bi-

long Russia, Vladimir Putin, Praim Minista bilong Japan, Shinzo Abe, Presiden bilong China, Xi Jinping, Praim Minista bilong Australia, Malcolm Turnbull i bin bung long Lima long las wiken.



Praim Minista Peter O'Neill wantaim arapela ol lida bilong APEC memba kantri long Lima, Peru long las wiken.

PNG na Thailand laik strongim invesmen

PNG na Thailand i lukluk long strongim bisnis invesmen na kamapim dairekt flait namel long tupela kantri.

Praim Minista Peter O'Neill i bin bungim Deputi Praim Minista bilong Thailand ACM Prajin Juntong long Lima, Peru long las wik Sarere.

Tupela lida i bin go long APEC bung long Lima, Peru we arapela ol biknem wol lida bilong APEC memba kantri olsem Presiden Bar-

ack Obama bilong Amerika, Presiden Vladimir Putin bilong Russia na Praim Minista Shinzo Abe bilong Japan i bin bung.

Mista O'Neill i tok tenkyu long Thailand i stat long inves long PNG na i wok long givim teknikel helpim we ol manmeri PNG i nidim.

Mista Juntong i tok Thailand i wanbel long skelim ol ekspirens bilong em long planim rais, developim turis bisnis na kirapim pablik helt.

Dispela ekspirens bilong Thailand i ken helpim PNG long developim turisim, egrikalsa na medikol indastri bilong PNG.

Mista O'Neill i askim ol kampani bilong Thailand long kam inves na mekim bisnis long fiseris, nesurel ges na maining sekta long PNG.

Mista O'Neill i askim Thailan long opim dairek flait namel long tupela kantri na strongim bisnis na invesmen namel long tupela kantri.

IRC bai bihainim tok bilong gavman

KOMISINA Jeneral bilong Internal Revenue Commission (IRC), Betty Palaso, i sanap strong long bihainim toktok bilong gavman long kisim moa takis mani.

Gavman i givim wanpela bikpela wok long IRC long kisim moa long K2 bilien takis mani we planti ol kampani insait long kantri i abrusim IRC na i no baim dispela mani mak.

Sif Seketeri bilong gavman, Isaac Lupari, i bin askim IRC long mekim dispela wok bikos gavman i nidim mani long fainensim 2017 nesenel baset.

Mis Palaso i tok IRC bai bihainim dispela toktok bilong gavman na kisim olgeta mani we sampela ol bisnis na kampani i no baim takis long IRC.

"Wok bilong mipela em long kisim dispela mani. Mi wanbel long gavman i sapotim mipela. Mipela i nidim mani na ol samting tu long mekim dispela wok," em i tok.

Mista Lupari i bin bungim olgeta wok manmeri bilong IRC long las wik na givim dispela bikpela wok long ol.

"Sapos yupela i no go aut na kisim dispela mani, marasin long haus sik bai

sot, gavman bai no gat mani long baim skul fi bilong fri edukesen, nupela developmen long rot na bris bai no inap kamap, na planti gavman sevis bai no inap kamap," Mista Lupari i tok.

Em i tok namba wan wok olgeta IRC manmeri i mas mekim em long lusim opis, go aut na sekim ol bisnis na kampani, na lukim sapos ol i save givim takis long gavman o no gat.

"Lo i givim tok orait long yupela i mekim dispela kain wok. Gavman i stap baksait long yupela," Mista Lupari i tok.

Pislama tok orait bilong Milen Be tasol

NATIONAL Fisheries Authority (NFA) i tok ol i larim ol kampani na manmeri i kisim pislama long Milen Be Provins tasol.

Menesing Dairekta bilong NFA, John Kasu, i tok ol i rausim tok tambu long Milen Be Provins tasol na i no long ol arapela provins.

Mista Kasu i laik kliaim toktok bilong Minista bilong Fiseris na Marin Risos, Mao Zeming.

Minista Zeming i bin autim toktok olsem gavman i mekim disisen long rausim tok tambu long larim ol manmeri na ol kampani i kisim pislama long solwara bilong PNG.

Mista Zeming i tok stat long yia 2009, gavman i bin stopim ol manmeri na ol kampani long kisim pislama

bikos namba bilong pislama i wok long go daun.

"Long larim pislama i karim nupela na apim namba, dispela tok tambu i bin stap long 8 yia olgeta. Nau mipela i skelim olsem namba bilong pislama i go antap, na mipela i rausim dispela tok tambu," Mista Zeming i bin tok long las wik.

Tasol Mista Kasu i tok NFA i rausim tok tambu long Milen Be Provins tasol, na i no long arapela ol provins we ol i save kisim pislama.

"Stat long mun Desemba, Milen Be bai larim o kampani na manmeri i kisim pislama. Milen Be provins i save kamapim bikpela saplai, klostu long 118 tan bilong pislama long PNG i save kam long Milen Be," Mista Kasu i tok.

Memba bilong Samarai-Murua, Gorden Wesley, i bin wanbel tru taim em i harim olsem gavman i givim tok orait long rausim tambu.

"Planti ol pipel bilong mi i save kisim pislama na mekim mani long sapotim ol yet long dispela marin risos.

"Mi laik makim maus bilong ol pipel bilong mi na tok tenkyu long gavman i mekim gutpela disisen long givim dispela tok orait gen long kisim pislama," Mista Wesley i tok.

Gavana bilong Milen Be, Titus Philemon, i bin amamas tu taim em i bin harim olsem gavman i rausim tambu long kisim pislama.

Em i tok ol Milen Be manmeri bai kisim bikpela benefit bikos planti pislama bilong PNG i save kam long Milen Be.

Chuuk (TKK)

Pohnpei (PNI)

Port Moresby (POM)

GREAT VALUE
Book Now!

Spend Christmas in Federated States of Micronesia for just

PGK 999* Return

Our twice weekly services commence 03 December 2016.



Air Niugini
www.airniugini.com.pg

For more information call
Toll Free on **180 3444**

* Conditions Apply. Subject to availability and fares can change without notice. Fare includes travel taxes. Effective from 03 Dec 2016 to 03 Feb 2017.

Nupela kolum toktok bilong UNRE bai kamap long hia



VUDAL Yunivesiti bilong Nesurel Risos na Envairomen – (PNG-UNRE) bai gat wanpela kolum long dispela pes insait long Wantok Niuspepa stat long wik i kam.

Dispela disisen i kam long PNG-UNRE yet long putim sampela toktok bilong save long eria bilong nesurel risos na envairomen. Taitel bilong kolumn em bai stap olsem “TOK DIDIMAN”.

Het ov Pablik Rilesens long UNRE, Lythia Suitawa i tok long wanpela pas i kam long Wantok Niuspepa olsem, yu-nivesiti i gat tingting long painim rot bilong givim ol gutpela tok save long ol nupela kain rot bilong wokim egrikalsa i go long ol fama long ples.

“Ol trening bilong mipela i save lukluk long givim ol yangpela lain gutpela save bilong saiens long lukautim gut ol nesurel risos bilong yumi na bai ol inap stap longpela taim yet. Mipela i luksave long kontribusen bilong ol liklik sabsisten fama na fisamen long i gat kaikai longpela taim na long olgeta kain taim.

Long dispela i bihainim tingting bilong PNG Visen 2050 long kamap Smat, Wais, Fe na Helti na Hepi Sosaiti bilong 2050,” em i tok.

“Salens long fama kontribusen tasol i no gat inap tok-save long ol nupela we bilong egrikalsa. Olsem i no gat gutpela rot bilong salim tok save i go. Dispela as mipela olsem wanpela haia institusen bilong edukesen, i painim rot bilong salim ol toksave i go long ol fama,” Mis Suitawa i tok.

PNG URE i lainim helpim long autim ol toktok bilong ol nupela na gutpela wei bilong wok fama wok long Wantok Niuspepa long wan wan wik bikos Wantok Niuspepa em i wanpela pepa tasol i save ranim nius na skul toktok long Tok Pisin, em i tokples bilong PNG stret.

Stat long neks wik Fonde, bai Wantok Niuspepa i stat ranim ol toktok bilong didiman long ol kain kain krop na pis na tu long ol het tok olsem birua i kamap long ol binatang nogut bilong bagarapim ol samting long fam, long daunim ol gras nogut, long putim gris long graun na long stopim ol graun long bruk na wara karim i go.

Edita bilong **Wantok Niuspepa**, Veronica Hatutasi i tok amamas long UNRE long makim Wantok Niuspepa long ranim ol kain gutpela toktok bikos long ol bikipela hevi nau i save bungim yumi long Klaimet Senis, solwara i kam antap moa, ol binatang nogut i bagarapim ol lip na diwai samting na yumi nidim helpim bilong saiens.

“Wantok Niuspepa em i pepa bilong ol rurel fama stret, olsem na UNRE Pablik Rilesens i mekim rait tingting long kam na putim ol dispela toktok long kolum bilong mipela,” Misis Hatutasi i tok.

“Mi laik tok tenkyu long Profesa John Warren bilong Yunivesiti bilong Nesurel Risos na Envairomen long givim tok orait long dispela kolum bilong wik wantaim Wantok Niuspepa,” Misis Hatutasi i tok.

James G. Kila i raitim

MOA long 900 pipel stap long namba 14 PNG Maining na Petroleum Invesmen Konperens long Sidni, Australia stat long Disemba 5 i go 7 bai yusim nupela teknoloji.

PNG Semba ov Mains na Petroleum insait long wanpela stetmen bilong en long Mande dispela wik i tokaut olsem dispela em nupela teknoloji stret ol bai yusim long namba wan taim long histori bilong semba we i save ranim ol bikipela konperens o kibung olsem.

Ol i kolim nupela aplikesen long ‘Event Briefcase’ na em i olsem mobail kalkuleta

o fon bai givim olgeta kain infomesen long lain husat i stap long PNG Maining na Petroleum Invesmen konperens.

Em bai givim infomesen long sait long lain i givim toktok, husat lain i givim toktok, ol infomesen long wanem toktok kamap long wanem eria, ol sponsa na wanem ol toktok i kamap.

Ol lain long konferens bai i ken yusim tasol Smart fon mobail o tablet bilong ol long lukim ol infomesin.

Eksekutiv Dairekta bilong PNG Semba ov Mains na Petroleum, Greg Anderson i tok dispela Apps em wanpela nupela kain teknoloji

Yangoru-Saussia Yunivesiti Lening Senta kisim 10-sita



Ol sumatin bilong Nagum Adventis Haiskul i sindaun long greduesen de bilong ol.

YUNIVESITI Lening Senta long Yangoru-Saussia distrik nau i gat wanpela 10-sita lenkrusa we Kumul Petroleum Limited i bin givim long ol.

Kumul Petroleum Limited em i wanpela Papua Niugini kampani stret olsem na em i givim dispela kain helpim long edukesen bilong ol pikinini bilong Yangoru-Saussia bai kamap gut.

Kumul Petroleum i bin

givim dispela 10-sita lenkrusa long taim bilong greduesen bilong Nagum Adventis Haiskul na tu, long taim lokal memba, Minista Richard Maru, i bin opim nupela sola pawa long dispela skul tupela wik i go pinis.

Mista Maru i tok olsem ol i givim ol dispela samting long soim olsem Yunivesiti Lening Senta bai givim namba tu sans long ol

sumatin sapos ol i no winim spes long Gret 11 o 12.

Long dispela taim tu, Minista Maru i bin givim ol sek mani inap long K100,000 wan wan i go long Urimo na Kamambruka Praimeri Skul, K15,000 i go long Morgen Praimeri Skul na K100,000 i go long Wiamungu na kamapim nupela helt pos long Barat.

Em i tok moa olsem wanpela moa mani inap long

mak bilong K400,000 nau i redi long wokim nupela polis stesin bilong Nagum na narapela K400,000 i stap long wokim nupela Yari-Nungawa Praimeri Skul.

Minista Maru i singaut long ol lida bilong dispela tupela hap long stretim ol toktok bilong graun na bai wok i ken kirap long dispela tupela bikipela projek insait long Urimo bilong Sausse LLG.

O’Neill no lus tingting long Maprik

PRAIM Minista Peter O’Neill i bin tok promis long givim K10 milien long kirapim gen Hayfield Ples Balus long Maprik, Is Sepik Provins.

Memba bilong Maprik, Simon John, i tok Mista O’Neill i no lus tingting long dispela tok promis em i bin

mekim sampela mun i go pinis.

“Mi laik tok tenkyu long Praim Minista bilong yumi i bihainim tok promis. Em i givim hap bilong dispela mani pinis.

“Fainensal situesen bilong gavman i no orait na mipela

i save olsem gavman i wok long bungim hevi long mani.

“Mi bilip olsem Praim Minista bilong yumi bai givim hap mani long bihain taim,” Mista John i tok.

Em i tok dispela mani bai kirapim Hayfield Ples Balus na bringim moa developmen

long Maprik na Sentral Sepik.

“Projek bilong kirapim dispela ples balus em i wanpela namba wan projek long Sentral Sepik. I no Maprik distrik tasol bai kisim benefit, arapela ol distrik long Is na Wes Sepik tu bai kisim benefit,” Mista John i tok.


Nupela teknoloji Apps bai helpim PNG risos invesmen konprens

we bai bringim naispela kala long konperens long Sidni, Australia.

Mista Anderson i tok olsem ol lain husat i laik rejista long konperens bai kisim wanpela tok save buk i givim infomesen long wanem rot long go insait long dispela Apps, na wanem rot long yusim.

Em i tok rejistresen bilong invesmen konprens i stap long on-lain long invesmen konperens websait em www.pnginvestment.com

Nupela Apps bai givim infomesen long PNG Maining na Invesmen Konprens.



Murray i daunim Djokovic

ANDY Murray bilong Briten i daunim namba 5 taim sempion, Novak Djokovic, long winim namba wan taim ATP Wol Tua Fainal taitel bilong em na pinisim 2016 olsem wol namba wan tenis pilaia.

Wantaim pinis bilong dispela yia, Murray i win long fainal bilong bikpela resis wantaim 6-3, 6-4 long O2 Arena long London.

“Mi gat bikpela amamas long win na kamap namba wan long wol em i bikpela samting,” Murray i tok.

“Em i bikpela samting long pilai egensim Novak long dispela kain resis.”

Dispela win i pinisim 4-pela yia ran bilong Djokovic long tonamen na bid bilong Serb long bungim siks taitel



Andy Murray i bin resis long 24 gem we ol i no bin daunim em.

rekot bilong Roger Federer.

O2 Arena i bin pulap wantaim 17,000 manmeri ol i bin kam sindaun long wanpela kain resis olsem boksen. Tenis resis bilong tupela pilaia i pulim planti lain long kam lukim bikos Murray i salensim sempion bilong tenis.

“Tru tru, Andy em i namba wan tenis pilaia long wol nau.

“Em i ken win long en em i win bikos em i namba wan pilaia.

“Mi bin pilai gut klostu long pinis bilong resis, tasol em i no inap long winim poin bilong Andy,” Djokovic i tok.

Victor Moses kisim bikpela wok long Chelsea



Victor Moses i no pilai gut long stat bilong Premia Lig aninit long menesmen bilong Conte inap long Conte i senisim em long 3-4-3 sistem long stat bilong Oktoba. Stat long dispela taim, em i stap long olgeta lig resis na skoim wanpela gol egensim Leicester, we em i bin amamas long gol bilong em long etletik stail.

VICTOR Moses i gat 25 kris-mas i no bin pilai wanpela lig resis bilong Chelsea moa long tripela yia, tasol nau em i gat bikpela wok long 3-4-3 sistem we ol i bin kisim em long top bilong premia lig.

Em i wanpela pilaia tasol i bin go pilai long Liverpool, Stoke na West Ham long dispela taim, tasol em i no

mekim gut long wanpela bi-long ol dispela klap.

Nau em bai stat na pilai olsem wanpela nupela pilaia we em i bin stat wantaim 38 lig gem tasol long ol tripela sisen i go pinis.

Nau em i gat nupela laip bikos Manesa bilong Blues, Antonia Conte, i givim em sans long rait wing long baksait.

Dispela em i nupela posisen bilong Nigeria intenesenel, tasol em i soim strong bilong em long 1-0 win bilong Chelsea win egensim Middles-brought long Sande. Em i kisim dispela posisen na pilai gut tru.

Em i salim bal i go long kona na Diego Costa long kisim dispela skoa bilong Chelsea long win.

Hull i winim CME Grup Tua Sempionsip

CHARLEY Hull bilong Inglan i winim CME Grup Tua Sempionsip wantaim tupela sot long kisim namba LPGA taitel.

Hull i gat 20 krismas i pinisim tonamen rekot long 19 anda par long daunim Ryu So-yeon bilong Saut Korea.

Hull i statim fainal raun wantaim wan sot na i stap pas na siks anda par 66 long fri raun bilong em long Florida.

Wol namba wan, Lydia Ko, i kamap namba 10 ples na Jodi Ewart Shadoff bilong Inglan pinisim namba 36.

Hull i stap wankain ples wantaim Ryu bihain long 16, pilaia bilong Korea i abrusim par na putim long 17 taim Hull i bedim long hul long stap pas na pinisim tu sot swing.



Poto Charley Hull i pinisim namba 7 long Rio Olimpik resis.

Tupela pilaia wantaim i resis long fainal raun na Hull i winim taitel long fainal tonamen bilong sisen.

Dispela em i namba tu tai-

tel bilong Hull inap long em i bin joinim profesenel resis long 2013. Em i bin winim Lalla Meryem Kap long Yuropien Tua long 2014.

Kangaroo daunim ol Kiwi



Cameron Smith i apim tropi wantaim ol tim poro bihain long ol i winim Foa Nesens Fainal.

OL Australia Kangaroo i ran na kamap wina long Foa Nesens fainal wantaim 34-8 win egensim ol Nu Silan Kiwi.

Ol Kangaroo i kamap sempion bilong tonamen na ol i makim ol olsem namba wan kantri long wol long pilai ragbi.

Pilaia bilong ol, Blake Ferguson, i putim namba wan trai bilong ol Australia long namba 3 minit bihain long ol i pekim wanpela skram bikos pilaia bilong ol Kiwi, Solomon Kate, i asua long holim bal gut long 4-pela mita klostu long trai lain bi-long ol Kiwi.

Johnathan Thurston i no bin painim hat long kikim konvesen i go insait we ol i stap pas, 6-0.

Namba tu trai bilong ol Kangaroo i bin kamap long namba 14 minit we Thurston i bin kikim konevsen i go insait na ol i stap pas yet wantaim 10 poin.

Cooper Cronk bilong Australia i kikim bal i go antap tru na Jordan Rapani i no kisim bal gut we Valentine Holmes bilong Australia kisim bal long graun. Rapani i rausim bal long han bilong Holmes na referi i bin givim wanpela penelti egensim ol Nu Silan. Thurston i bin

kisim tupela poin long dispela penelti na skruim poin i go antap long 12-0 long namba 17 minit.

Issac Luke bilong Kiwi i asua long namba 21 minit na referi i givim bal long ol Australia. Long namba tu takel, Cameron Smith i kisim bal na ran i go insait long banis bi-long ol Kiwi na taim ol i laik takelim em, Smith i salim bal i go long poro pilaia bilong em, Trent Merrin, husat i putim namba 3 trai bilong ol Kangaroo. Thurston i no bin westim kik we ol Australia i stap pas yet, 18-0.

Long namba 28 minit, wanpela pilaia bilong Nu Silan i bamim birua bilong em na referi i givim narapela penelti gen na Thurston i kisim tupela poin long dispela penelti. Nau ol i skruim skoa bilong ol i go antap moa long 20-0.

Thurston i kikim wanpela sotpela kik long sait lain long namba 32 minit na poro pilaia bilong em, Josh Dugan, i ran i go na kisim bal na putim namba 4 trai bilong ol Kangaroo. Thurston i painim hat taim long kikim bal i go insait long gol pos taim em i sanap long sait lain. Australia i stap pas yet wantaim 24-0 poin.

Long 44 minit bilong namba tu hap bilong resis,

Darius Boyd, i painim wanpela rot na i ran strong we Tohu Harris bilong ol Kiwi i laik holim em tasol Boyd i trikikim em na putim namba 5 trai bilong ol Australia. Ol Kiwi i no bin putim wanpela trai i go inap long ol i bungim namba tu hap bi-long taim we skoa bilong ol i sanap olsem 28-0.

Jordan Kahu bilong ol Kiwi i putim namba wan traim bi-long ol Nu Silan long namba 55 minit, bihain long referi i bin givim wanpela penelti egensim ol Australia. Tasol, konvesen kik bilong ol i no go insait na skoa bilong ol i sanap olsem 28-4.

Na ol i putim namba tu trai bilong ol long namba 68 minit skruim skoa bilong ol wantaim 4-pela poin, 28-8, bihain long konvesen kik bi-long ol i no go insait.

Long namba 74 minit bi-long resis taim, Jonathan Thurston i ran go klostu long trai lain bilong ol Kiwi na salim bal i go long Bord Corder na Coedner i ran stret long birua bilong em, Lewis Brown. Em i pusim Brown i go aut na putim fainal trai bilong ol Kangaroo. Konvesen kik bilong Thurston i go insait, 34-8, na winim gen Foa Nesens sempionsip resis.

Wales i daunim Japan long Autumn intenesenel



Dan Lydiate i skoaime namba wan traim bilong em long Wales na putim ol 7-6 pas egensim ol Japan.

FLAI hap bilong Wales, Sam Davies, i sevim ol Wales long Prinsipaliti Stediam wantaim wanpela drop gol long namba 80 minit long daunim Japan, 33-30.

Konvesen kik bilong Yu Tamura bilong Japan long trai bilong Amanaki Lotoahea long 76 minit klostu ol i dro.

Ol Wales i stap pas wantaim 11 poin long namba tu hap bilong resis bihain long ol trai

bilong Dan Lydiate, Jamie Roberts na Sam Warburton.

Tupela winga, Akihito Yamanda na Kenji Fukuoka, em i tupela pilaia bilong putim trai bilong Japan.

Namba 10, Davies, i stap longwe inap long 30 mita na drop kik long kisim fainal go bi-long Wales long namba tu resis bilong em long intenesenel gem.



Ol LOA siaman bai kot sapos ol passim Ramu NiCo Projek

MINERAL Risos Atoriti (MRA) i salim wanpela bikpela tok lukaut i go long ol lenona siaman na papagraun bilong Ramu NiCo Projek insait long Madang Provins long noken passim o distepim Ramu NiCo projek long KBK Main na Basamuk Rifaineri.

Menesing Dairekta bilong MRA, Philip Samar i givim dispela tok lukaut long mun Novemba 14 aninit long luksave bilong Maining Ekt 1992 seksen 167 (ofens) bihain long ol siaman bilong Lenona Asosiesen (LOA) i bin salim wanpela pas long Novemba 8 long stopim Ramu NiCo Projek.

Ol 3-pela LOA siaman, Peter Tai (Maigari), Jeffery Gamrai (Coastal Pipeline) na Sama Mellombo (Basamuk) i bin salim pas i go long Ramu NiCo Menesmen na MRA olsem ol bai pasim Projek sapos ol risponsibel lain i go pas i no luksave long helpim bilong ol olsem peim royalti long papagraun, Nesenel Gavman long givim K10 million em i bin promis long 5-pela krismas i go pinis olsem bisnis developmen grent na sait bilong givim bisnis i go long ol papagraun aninit long bisnis spin-off.

Mista Samar i tok wok main insait long kantri em i wanpela ki ektiviti o bikpela bisnis wei save kisim bikpela mani kam insait long ikonomi na gavman i luksave long dispela aninit long mama lo bilong kantri. Na husat man or meri o ol siaman laik distepim wok main o pasim main em lo bilong kantri bai givim bikpela mekim save long ol.

"Ramu nickel/kobalt em Ramu NiCo-MCC i papa long em. Dispela projek na ol nara-pela wok antap long graun em i stap long en, em i stap antap long Maining Tenements or luksave bilong lo we gavman bilong PNG i givim,"

"Dispela ol maining lis em Maining Ekt (lo) i lukautim na long enfosim na mekim kamap gutpela na strongim em stap aninit long wok bilong Managing Dairekta na MRA," Mista Samar i tok.

Mista Samar em i Menesing Dairekta bilong MRA na long i givim em pawa long edministarim na enfosim dispela Lo na duti bilong em long mekim save long husait man i distepim main o i klosim main.

"Dispela Lo or Ekt aninit long seksen 167 i tok klia olsem husat man or meri i distepim o pasim wok bilong main lo i givim mekim save na em bai peim i no moa long K10,000 o bai go long haus kalabus i no moa long 4-pela yia or bai kisim tupela mekim save wantaim long fain na go kalabus wantaim," Mista Samar i tok.

Mista Samar i tok ol dispela bel hevi bilong ol papagraun em gavman na MRA wantaim Ramu NiCo i wok long traim long stretim long ol level bilong ol yet na bai kisim planti taim liklik tasol em i askim ol papagraun long mas kisim gutpela bel na sapotim projek.

Long wankain taim, ol papagraun i tok aut stret olsem ol i bai ino nap stopim main tasol bai sapotim na larim gavaman, MRA na Ramu NiCo long stretim ol dispela tripela hevi bilong ol long leve bilong ol yet.

Long wanpela konferens wantaim Mista Samar na ol LOA Siaman long Mun Novemba 15, olgeta siaman i tok dispela tingting bilong ol lo disturbim Ramu NiCo Projek i bai no nap kamap na askim Gavman long mas givim dispela K10 million i gavman i promisisim, royalti bilong ol papagraun i mas peim ariap na ol bisnis spin-off i mas kam gut.

Long dispela miting tu ol i wanbel olsem ol royalti bai kampani i peim klostu tasol i

gat sampela hevi we ol loya i traim long stretim pastaim we bai ino nap kamapim hevi long bihain taim. Ol i luksave tu olsem Ramu NiCo na gavman i bin toktok long wei bilong peim royalti we aninit long Main Developmen Plen bai ino nap long Kampani bai peim bikos prais bilong nikel i daun-bilo tru.

Ol i luksave tu olsem dispela K10 million em politikel komitmen na i stap long pawa na strong bilong O'Neil-Dion Gavman long luksave hariap. MRA i bin submitim wanpela NEC submisin i go long Maining Minista long givim long Praim Minista na NEC kabinet long luksave na peim areap.

Ol i wanbel tu olsem long Disemba 14 bai Ramu NiCo, MRA na ol papagraun bai kamapim wanpela forum long paitim tok long sait bilong Business Spin-off.

Long wankain taim, Ramu NiCo i soim bel hevi bilong em olsem long stat bilong 2006, kampani i bin statim ol papagraun kampani na givim planti bisnis spin-of tasol ol papagraun i no menesim gut na dispela i soim olsem benefit i no go long ol liklik lain long asples.

Ol papa na mama graun long KBK na Basamuk i bin soim bel hevi bilong ol long dispela tok bilong pasim projek na tok ol siaman i mas yusim posisin bilong ol long toktok wantaim gavman na MCC na noken kam long asples na sikirapim or yusim ol asples lain long pasim projek.

"Ol LOA na LOA kampani i no fit long menesim ol kampani na peim dividen na yet ol i laik kam yusim mipela. Dispela as tingting bilong ol na taiming em i no go stret wantaim tingting bilong mipela na mipela ol asples lain bai nonap sapotim," wanpela asples lida long KBK Main i toktok.




Bikpela HPL masin bilong kisim nikel na kobalt long Basamuk Rifaineri.



Ramu NiCo wokman long sefti i redi long wok.



Sip i lodim MHP long go long ol ovasis maket.



Kia Motors i sponsa long FIFA resis

KIA Motors Kopresen i patna wantaim FIFA na i givim 60 kar long sapotim ol long transpotesen bilong FIFA Anda 20 Wol Kap resis bilong ol meri.

Ol Kia kar olsem Sorento, Optima na Sportage bai sapotim ol Lokel Ogenaising Komiti (LOC) na ol opisal bilong FIFA na ol deleget long olgeta hap long wol.

Olsem opisal 'Opisal Atomotiv Patna', ol i yusim ol wol klas kar long stat bilong soka resis bilong ol meri i go

inap long pinis bilong en long Desemba 3.

Jenerel Menesa bilong Kia Motors Papua Niugini, Shane Boyce, i tokaut na givim ol kar i go long han bilong Vais Presiden bilong FIFA, David Chung, long Sir John Guise Stediam.

“Mipela i gat bikipela amamas wantaim dispela sans long long sapotim FIFA na Lokel Ogenaising Komiti long ol i go pas long dispela namba wan na bikipela iven.

“Mipela i amamas long givim ol dispela kar long helpim FIFA na LOC long transpotim ol samting bilong gem na pipel long taim bilong resis,” Boyce i tok.

Chung i tok tenkyu long Kia Motors na i tok, “Mipela i gat bikipela amamas long ol i sapot yet na i laik tok tenkyu long Kia Motors long ol i mekim namba wan wok long redim ol kar long transpotim ol pipel bilong yumi long seif wei.”



Jenerel Menesa bilong Kia Motors Papua Niugini, Shane Boyce, long han kais i givim sain bilong Kia Motors i go long Vais Presiden bilong FIFA, David Chung, long Sir John Guise Stediam. Na SUSA bilong FIFA Anda 20 Wol Kap resis bilong ol meri tu i sanap long rait bilong ol Kia kar i stap long en.

Korea DPR i kisim top ples long Grup A

PAPUA Niugini, husat i lukautim 2016 FIFA Anda 20 Wol Kap resis bilong ol meri i tok gut bai long resis bihain long Korea DPR i daunim ol, 7-1.

Tasol, ol i amamas long ol i kisim namba wan gol bilong ol long wol kap resis.

Ol Korea DPR bai resis egensim ol Nigeria long kwata fainal, husat i kamap namba tu long Grup B.

Top ples long Grup B em Japan i winim bihain long ol i bin daunim ol Keneda long fainal resis bilong Grup B.

Nau ol Japan bai pait egensim ol Brasil long kwata fainal, bihain long ol Brasil i bin daunim ol Sweden long fainal bilong grup resis.

Long fainal resis bilong Grup A, Brasil na Sweden i kisim wankain poin, 1-1, na Korea DPR i daunim Papua Niugini wantaim 6-pela poin, 7-1.



Tupela pilaia bilong Papua Niugini i amamas bihain long ol i kisim namba wan gol bilong ol long FIFA Anda 20 Wol Kap resis bilong ol meri egensim ol Korea DPR. Korea DPR i daunim ol PNG, 7-1.

Nigeria i daunim Spain, 2-1, na Japan i daunim Keneda, 5-0, long Grup B resis i bin kamap long las wik Sande.

INAP long planti mun i kam inap nau, moa long tausen manmeri husat i save stap long Pot Mosbi i bung wantaim long ol strit bilong Pot Mosbi long olgeta Sande long wokabaut long “Wokabaut bilong Laip” program.

Dispela program em i bilong stap gut long sait bilong helt we gavana bilong NCD, Powes Parkop, i kamapim long wankain taim bilong 2016 FIFA Anda 20 Wol Kap resis bilong ol meri i kamap.

Bikipela ol bikipela sapota i joinim dispela program na intenesenel futbol pilaia bilong

Inglan, husat i bin pilai tripela taim long FIFA Wol Kap resis bilong ol meri, Alex Scott, i wokabaut tu wantaim moa long 100 boi na gel long makim Yunivesel De bilong ol Pikinini (UCD) na 70 yia bilong UNICEF.

“Planti tenkyu i go long olgeta lain husat i welkamim mi wantaim dispela “Wokabaut bilong Laip,” Scott i tok long taim ol i go kamap long Ela Nambis.

Long wankain taim, Presiden bilong Papua Niugini Futbol Asosiesen i tok tenkyu long Alex Scott na ol lain husat i wokabaut wantaim.

Pro Boksen bai kamapim namba wan pait

PROFESENEI Boksen Asosiesen long Nesenel Kapitel Distrik bai kamapim namba wan Pro Boksen Tonamen bilong em long Pot Mosbi long mun i kam.

Vais Presiden bilong Niugini Profesenel Boksen Asosiesen, Alvin Wafiwa, i tok, dispela tonamen em i stap bilong Pro Boksen long PNG.

“Aninit long dispela iven, mipela i lukluk long promotim na kamapim nupela gen amamas bilong Pro Boksen i stop long kantri.

“Long wankain taim, mipela bai maketim ol boksa

bilong mipela long ol sponsa na sapota,” Wafiwa i tok.

Em i tok moa olsem i gat provinsal Pro Boksen klap long Lae, Vanimona Goroka, tasol dispela tonamen em i bilong ol paita husat i save stap long Pot Mosbi tasol.

“Mipela i tok orait long ol klap long Bereina, Mekeo na ol narapela klap long Sentral Provins i kam na resis wantaim,” Wafiwa i tok.

Wafiwa i laikim olgeta Pro Boksa long NCD long kisim wanpela Profesenel Boksen Laisens fom long presiden bilong Profesenel Boksen,

Ben Yawingu, long rejista olsem wanpela Pro Boksen etlit aninit long Geming Kontrol Bod.

Pait bai kamap aninit long ol wan wan grup stat long lait weit i go inap long hevi supa weit long taim bilong tonamen.

“Mi laikim ol wan wan sponsa husat i gat laik long sapot i ken helpim Pro Boksa long mekim maket i kamap bikipela long kantri,” Wafiwa i tok.

Namba wan resis bai kamap long Desemba 18 long Spot Inn Klap long Pot Mosbi.

Ol Kurakum i go insait long Kwinslan AFL Sempionsip

PAPUA Niugini Australian Futbol Lig i kamapim meri AFL etlit bihain long ol i tokaut long AFL skul resis program bilong ol.

Wantaim AFL Developmen program, PNG Yut tim bilong ol gel i bin resis long Kwinslan Sempionsip i bin kamap pinis klostu taim long kisim ekspirians.

“Em i gutpela long kam

bek bihain long tripela yia long soim ol gel bilong yumi na givim ol strong bilong gem long tonamen,” Saut Pasifik AFL Developmen Menesa i tok.

“Olsem hap bilong developmen program, mipela i bin ranim Anda 13 na Anda 15 resis insait long 4-pela yia i go. Dispela i kamap bikipela na nau mipela i gat bikipela pul

we ol gel i pilai AFL long olgeta hap long Papua Niugini.”

AFL PNG Developmen Ekademi na Pilaia Welfe Menesa, William Yogomin, i tok tu olsem, dispela gem em ol man tasol i bin pilai, tasol nau wantaim skul resis i kamap aninit long developmen program i strongim planti gel long Anda 13 na Anda 15 long pilai.



Ol PNG Yut gel na Australia gel husat i bin pilai long Kwinslan Sempionsip i stap bung wantaim.

Bikipela sapot long “Wokabaut bilong Laip” program



Wanpela futbol pilaia bilong Ingla, Alex Scott, i holim han na wokabaut wantaim long “Wokabaut bilong Laip” program long Novemba 20, 2016 long Pot Mosbi.

Kwata fainal resis bai kamap klostu

Meksiko i go insait long kwata fainal

OL tim long Grup C na Grup D bilong 2016 FIFA Anda 20 Wol Kap resis bilong ol meri i kamap orait we ol i bin pilai wanpela namba wan na amamas gem long fainal grup resis bilong ol long Mande apinun.

Long Grup C, Frans na USA i bin kisim wankain poin na ol bai yusin narapela rot bilong painim aut wanem tim bai kisim top ples.

Long wankain taim, Jemani i kisim top ples bilong

Grup D bihain long ol i bin winim tripela grup resis bilong ol. Ol i bin daunim Korea Ripablik, Meksiko na Venezuela.

Long fainal gem bilong Grup C em USA na Ghana i bin kisim wankain poin, 1-1, long Sir John Guise Stediam long Mande. Na Frans i daunim ol Nu Silan, 2-0.

Long fainal resis bilong Grup D i bin kamap long Bava Park em Jemani i daunim Korea Ripablik, 2-0, na

Meksiko i daunim ol Venezuela, 3-2.

Ol kwata fainal resis bai kamap tude, Fonde Novemba 24, we Korea DPR bai salensim ol Spein long Nesenel Futbol Stediam na Japan na Brasil bai pilai bihain long wankain pilai graun.

Kwata fainal resis bai kamap long Fraide, Novemba 25, we ol USA bai salensim ol Meksiko na Jemani bai salensim ol Frans long Sir John Guise Stediam.

MEKSIKO i stap laip yet bihain long ol i bin pait egen-sim ol Venezuela na go insait long kwata fainal bilong FIFA Anda 20 Wol Kap resis bilong ol meri.

Ol Meksiko i strong long go insait long kwata fainal

we tupela gol bilong Kiana Palacios long namba wan hap na gol bilong Teresa Gonzalez long 53 minit givim ol tripela gol long stap pas.

Tasol, ol Venezuela i bin pait bek strong we Gabriela Garcia na Lourdes Moreno i

kisim tupela gol. Ol Meksiko i strongim banis bilong ol inap long ol i bungim pinis taim bilong resis na ol i win wantaim wanpela poin.

Laip Yo Gol Pilaia bilong resis em Kiana Palacios bilong Meksiko.

Jemani i rausim Korea Ripablik



Kim Soeun bilong Korea Ripablik na Laura Freigang bilong Jemani i bam taim ol Jemani i strong long painim moa gol.

JEMANI i pinisim Grup D resis bilong em gut tru wantaim 2-0 win egensim ol Korea Ripablik long Sir John Guise Stediam.

Tripela taim sempion bilong FIFA Anda 20 Wol Kap resis bilong ol meri i bin nidim wanpela poin tasol long go antap long top ples we Dina Orschmann na Ste-

fanie Sanders i isi tru putim tupela gol.

Orschmann i putim namba wan gol bilong resis long namba 13 minit bihain long em i bin sanap long 45 digri enkel na abrusim tupela birua pilaia na kik.

Sanders i bihain bal na ran i go klostu taim Anna Gerhardt i kikim bal i go long

em. Sanders i makim gol pos na straikim bal we bal i no abrusim net.

Ol Jemani i strong long painim moa gol tasol ol Korea Ripablik i no givim moa sans long skruim skoa bilong ol.

Laip Yo Gol Pilaia bilong dispela resis i bin go long Stefanie Sanders bilong Jemani.



Tupela birua pilaia i ran long kisim bal.

Rafanny Mendoza bilong Venezuela i traim long takolim Kiana Palacios bilong Meksiko.

Ol Frans i go long nokaut



Ol i bin daunim Frans we ol i go insait long nokaut na ol pilaia bilong Frans i amamas bihain long ol i bin daunim ol Nu Silan, 2-0.

OL Frans i win long fainal Grup C resis bilong ol we ol i bin daunim ol Nu Silan, 2-0, long FIFA Anda 20 Wol Kap resis bilong ol meri long Bava Park long Mande.

Dispela em i namba wan win bilong ol Frans long tonamen we ol i bin dro long tupela grup resis i bin kamap pastaim.

Namba 10 pilaia bilong ol Frans i putim tupela gol we ol Nu Silan i no bin kisim wanpela poin.

Ol Nu Siulan i pait strong egensim ol Frans long kisim sampela gol tasol banis bilong ol Frans i strong tru long dispela taim.

Laip Yo Gol Pilaia bilong resis i bin go long Delphine Cascarino bilong Frans.

Ghana i sot long poin ...USA i go insait long kwata fainal

YUNAITET Stet bilong Amerika (USA) i kisim top ples long Grup C bihain long ol i kisim wankain skoa wantaim Ghana, 1-1, bikos ol Ghana i sot long poin long go insait long kwata fainal.

Dispela em i wanpela strongpela pait i kamap we tupela tim wantaim i nogat inap sans long kisim gol long Sir John Guise Stediam.

Tupela gol i kamap long namba wan hap bilong resis we ol Ghana i kisim gol bilong ol long namba 20 minit bilong resis taim.

Ernestina Abambila i sanap long beklain na kikim bal i go klostu long golkipa bilong ol USA, Casey Murphy, we Murphy i no inap long holim bal strong na bal i abrusim lain na i go insait long net.

Tasol, kepten bilong USA, Mallory Pugh i bin straikim bal long wanpela gep na golkipa bilong ghana i abrus long holim bal.

Banis bilong tupela tim wantaim i strong long namba tu hap bilong resis na i no gat wanpela gol i kamap.

Laip Yo Gol Pilaia bilong resis i go long Katie Cousins bilong USA.

Tenkyu FIFA long kisim Anda 20 Wol Kap kam long PNG

Nicky Bernard i raitim

PAPUA Niugini i mas tok tenkyu long FIFA long kisim dispela Anda 20 Wol Kap kam long kantri bilong yumi.

Kantri bilong yumi PNG long sait bilong ol bal pilai, yumi no stap klostu long ol narapela kantri na nem bilong yumi i no bikpela long ol narapela kantri.

Dispela Anda 20 Wol Kap i bringim nem bilong Papua Niugini go long Wol mep na nau planti ol bikpela kantri i save long yumi tru long FIFA.

FIFA em bikpela nem long sait bilong soka na wol i luksave long dis-

pela nem FIFA long wanem ol save ranim soka gem long wol.

Papua Niugini em mas tok tenkyu long FIFA long givim sans long Anda 20 meri bilong PNG long pilai wantaim ol top Anda 20 meri bilong ol narapela bikpela kantri long wol.

PNG anda 20 meri i no gat sans long pilai long wol kap long wanem ol i no kwalifai long pilai, ol i stap aninit stret long ol narapela kantri.

Long go insait long wol kap ol Anda 20 meri bilong PNG mas go insait long planti pilai long bringim ol long kwalifai long wol kap sapos ol win.

Ol Anda 20 meri bilong yumi kisim sans long pilai long dispela

wol kap long wanem Papua Niugini i long lukautim dispela FIFA Anda 20 Women's Wol Kap 2016 long Pot Mosbi.

Sapos yumi PNG i no lukautim dispela FIFA Wol Kap bai ol Anda 20 meri bilong yumi PNG bai i no inap go resis long dispela pilai long narapela kantri long wanem ol i no kwalifai yet.

Olsem na PNG i mas amamas long ol Anda 20 meri bilong yumi na tok tenkyu long FIFA long bringim dispela wol kap kam long

yumi PNG long pilai egensim ol top anda 20 meri bilong ol narapela kantri we ol kwalifai long pilai long dispela wol kap.

FIFA wol kap tu save bringim planti samting, long sait bilong turis long sait bilong mani na planti moa samting dispela nem FIFA save mekim.

Nau Papua Niugini i stap ples klia long wol mep, dispela 17 tim bilong Anda 20 meri kam long kantri bilong yumi, wol i lukluk stap long kantri bilong yumi tu, nogut bai wanpela bikpela pilai gen bai kamap long kantri bilong yumi.

Olsem na yumi Papua Niugini manmeri na pikinini mas tok tenkyu long FIFA long bringim dispela Wol Kap soka kam long kantri bilong yumi Papua Niugini.

Ol Anda 20 meri bilong PNG tu mas tok bikpela tenkyu long ol manmeri go pas long toktok strong long bringim dispela Wol Kap kam long kantri bilong yumi.

Tingim ol narapela Anda 20 meri bilong narapela kantri i wok long pilai strong long stap insait long dispela wol kap nau kamap long kantri bilong yumi tasol ol i no kwalifai, tasol Anda 20 meri bilong PNG kisim sans long pilai long wanem yumi PNG lukautim dispela Pot Mosbi 2016 Anda 20 Womens Wol Kap.



haus dua bilong yumi na givim sans long Anda 20 meri bilong



PNG Anda 20 tim i redi long kisim N. Korea.



Ol bikpela na top meri referi tu kam long PNG long lukautim na refim gem.



Martha Karl bilong PNG i resis wantaim pilaia bilong Not Korea Wi Jong Sim, long kisim bal long las pul A pilai bilong ol Not Korea i win 7-1



DIANA White
Barbecue Flavour

WHITE TUNA
insait
K 2.20

DIANA
Barbecue Flavour

Manufactured by:
RD Tuna Canners Ltd.

Tasty and Flavourful White Tuna for Everyone!

Hunters i sainim 5-pela yia kontrak wantaim NFS

OL Papua Niugini SP Hunters i amamas long tokaut olsem ol i sainim 5-pela yia kontrak wantaim long pilai olgeta asples gem bilong ol long Nesenel Futbol Stediam (NFS) long Pot Mosbi, PNG.

Dispela i kamap bihain long ol i sainim kontrak asde

namel long Lloyd Robson Oval Trustees na PNG Ragbi Futbal Lig (PNGRFL).

Papua Niugini Ragbi Futbal Lig em i gavaning bodi bilong ragbi lig long Papua Niugini na i save lukautim PNG Hunters.

Klap PNG Hunters em ol i

bin kamapim long 2013 na nau em i save resis long Intras Supa Kap bilong Kwinslan Ragbi Lig.

Las yia i bin namba wantaim bilong ol long pilai olgeta asples gem long Nesenel Futbol Stediam na ol i bin gat namba wan sisen bilong ol

long histori bilong ol we ol i bin go insait long ol fainal.

Ol fainal gem em ol i bin pilai long PNG long namba wantaim na PNG ragbi lig intenesenel i gat bikipela luksave.

Siaman bilong Lloyd Robson Oval Trustees, Peter Botten, i tok, NFS i gat

bikipela amamas long patna wantaim PNGRFL long ol Hunters i ken pilai ol asples gem bilong ol long NFS.

"Nesenel Futbol Stediam em ol i bin kamapim long intenesenel wei na mipela i gat bikipela amamas olsem NFS bai kamap asples pilai graun bilong Hunters long olgeta taim long bihain," Botten i tok.

"Mipela i bilip olsem dispela i strongim faundesen bilong lonpela taim patnasip namel long PNGRFL na Nesenel Futbol Stediam na mipela i ken wok bung wantaim long kamapim moa bikipela ragbi lig gem long kantri inap long grasrut level i go antap long intenesenel level.

"Mipela i bilip olsem yumi ken wok bung wantaim na redim ol top klas prodak bilong ragbi lig pilaia na ol sapota bilong Papua Niugini."

Taim ol i welkamim dispela agrimen, Siaman bilong PNG RFL, Sandis Tsaka, i tok, ol i gat bikipela amamas long patna wantaim Nesenel Futbol Stediam bilong ol bai hostim ol gem bilong Hunters na amamas tu long bikipela developmen bilong spot long Papua Niugini.

"Nesenel Futbol Stediam em i wol klas fesiliti insait long rijon," Tsaka i tok.

"Ol sapota i soim sapot bilong ol long dispela yia i kamap namba wan tru na mipela i gat bikipela amamas long planti lain bin kam lukim gem taim mipela i go pas long ol resis long NFS.

"Mipela i lukluk long wok wantaim Lloyd Robson Oval Trustees long kamapim ol asples gem bilong ol Hunter insait long 5-pela yia na bringim gem i kamap bikipela long kantri."



Ol PNG SP Hunters 50 man skwat husat bai stat trening long dispela yia. Ol bai bringim namba i kam daun bihain long ol bai makim ol namba wan pilai.



Strongpela Marasin Bilong Kus Gutpela Praais!

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg